

東

華

續

錄

東華續錄

咸豐九十

臣王先謙敬編

臣陶濬宣恭校

咸豐十年庚申春正月丙寅朔 上以是年三旬 萬壽頒詔天

下○諭內閣本年朕三旬慶辰茲屆履端初吉業經特沛恩綸延

釐中外因念推恩之序允宜首重親親惇郡王奕誴著加恩晉封  
親王貝子奕効著加恩晉封貝勒惠親王之子奕詳恭親王之子

載澂均著加恩封爲入八分輔國公惠親王之子奕詢奕謨均著

加恩封爲不入八分鎮國公貝勒載治溥莊均著加恩賞加郡王

衍醇郡王奕譞著加恩賞銀三千兩鍾郡王奕詗孚郡王奕譓均

著加恩賞銀二千兩俱由內給發用示朕覃敷闡澤篤念宗支至

意○諭本年朕三旬慶辰業經渥敷闡澤而中外王大臣有勤勞

素著者允宜特沛恩施怡親王載垣科爾沁親王僧格林沁均著  
加恩賞穿杏黃色端罩貂褂其朝服蟒袍仍用藍色鄭親王端華  
著賞穿四圍正龍補服並著在紫禁城內乘坐二人肩輿大學士  
彭蘊章尙書穆蔭均著加恩賞帶花翎侍郎杜翰著加恩加二級  
侍郎匡源文祥均著加恩加一級以上加級在恩詔以外並准作  
爲隨帶侍郎靈桂著加恩賞還二品頂帶直隸總督恆福並加恩  
賞帶花翎兩江總督何桂清著加恩加太子太保銜用示朕宣綸  
錫義之至意○諭本年朕三旬萬壽著毋庸舉行告祭禮所有升  
殿禮儀著停止○諭本年朕三旬萬壽各省督撫及將軍提鎮等  
俱不准奏請來京祝嘏○予河南陣亡遊擊孫喬林等祭葬世職  
○己巳諭內閣本年朕三旬萬壽特頒恩詔德木楚克扎布拉木  
棍布扎布德木齊扎布布彥諾謨祜棍楚克林沁多爾濟那木凱

等或平日當差勤慎或奮勉出力自應各沛恩施德木楚克拉布  
著加恩賞穿親王補服扎木棍布扎布著加恩封爲郡王及身而  
止德木齊扎布布彥諾謨祜均著加恩賞用紫韁棍楚克林沁著  
加恩在御前大臣上行走多爾濟那木凱著加恩賞給頭品頂帶  
以示朕行慶推恩之至意○諭本年朕三旬萬壽業經降旨各省  
督撫將軍副都統等均著毋庸來京瞻覲惟思各蒙古等素習敦  
樸朕亦推誠優待該王公台吉等尙未旋回如六月間仍令伊等  
來京祝嘏正值炎暑往返跋涉尤不合體恤蒙古臣僕之意著理  
藩院傳諭御前乾清門行走之蒙古汗王公台吉等於本年六月  
朕萬壽聖節均著毋庸來京祝嘏以示朕體恤各蒙古之至意○  
諭都統勝保自簡任欽差大臣督勦皖省捻匪尙知奮勉迨護城  
一挫以後軍威不能復振以致廬定不能克復逆匪蔓延日久無

功實有難辭之咎著卽撤去欽差大臣以示薄懲惟念該都統平素帶兵勇往曾立戰功見在豫省堵勦需人著卽馳往河南督辦該省勦匪事宜卽派閻保爲勝保幫辦袁甲三仍著署理欽差大臣閻防督辦安徽軍務除翁同書本係幫辦外並派副都統穆騰阿幫辦軍務傅振邦著督辦徐宿一帶勦匪事宜仍著田在田幫辦其山東勦匪事宜卽派德楞額督辦並派乾清門三等侍衛哈勒洪阿幫辦著卽馳驛前往傅振邦無庸幫辦袁甲三軍務閻保亦無庸幫辦傅振邦勦匪事宜以期事權歸一各有專司自此次分派之後儻有賊匪由何路北竄卽將何路督兵大臣嚴加懲處決不寬貸其有應行互相援應之處仍不得區分畛域爾諸臣其同心協力盡殲醜類迅速成功毋負委任○以捐輸軍餉永廣江西新建學額十名高安八名南昌新昌各六名豐城廬陵各四名

清江三名奉新二名泰和金谿南城新城都昌德化贛縣各一名  
○庚午諭內閣惇親王次子載漪著承繼與瑞敏郡王奕誌爲嗣  
處降旨派勝保等分路督辦以期事權歸一各有專司見在東豫  
各境賊蹤雖遠而該撫出沒靡常勢極飄忽北省地勢平行無險  
可扼仍恐乘虛紛竄亟宜豫籌堵截前經通飭各省實行團練以  
助兵力見在徐宿地方緊要著何桂清嚴飭該地方官認真團練  
俾傅振邦等可以合力剿辦不至有兵力單薄之慮河南歸陳等  
屬曾經辦理堅壁清野山東曹單一帶團練向稱得力著瑛棨文  
煜再行嚴飭各該地方官實心經理不得因賊氛已遠稍有懈弛  
至山東曹州民團修築黃河北隄惟考城地方未經加築上年九  
月該匪即由此竄入擾及東明長垣自曹境而東直至宿遷亦未

修築若仿照曹州河隄一律加修認真挑築使沿河大隄屹若堅城亦可藉資守禦著何桂清瑛棨勸諭紳民妥爲辦理毋得視為具文將此由五百里各諭令知之○辛未諭軍機大臣等曾望顏奏石逆謀入川境亟應嚴防等語石逆攻陷廣西慶遠府逼近黔省都勻意圖由黔入川該省台江敘永瀘州綦江江津川南一帶均與黔境毗連設令竄入不惟川省完善地方遭其蹂躪卽陝西湖北亦將震動於大局甚有關繫著曾望顏嚴飭川南川東所屬文武一體偵探相機籌辦並飭酉秀彭涪各防所文武卽將竄入黔匪安速勦辦以杜勾結其湏匪上竄防禦不力業將督兵之提督阜陞等分別懲處仍責令迅圖埽蕩免致蔓延至所稱川省營員曉暢營務者均調赴他省出征存營員弁多不得力亦係實在情形見在所調陝甘官兵二千名計日可到勦辦必能得手惟陝

甘地方亦閼緊要此項官兵未便久畱在外如川境漸就肅清仍應撤回歸伍向來各省營伍兵丁多不足額錢糧半爲營員侵蝕甚至老弱充數空籍冒糧種種弊端殊堪痛恨川省兵丁多不得力實由於此該署督惟當嚴飭各營挑選精銳裁汰老弱務使兵無懸額餉不虛糜儻有前項弊端卽或寬其旣往必當倣其將來如能操練有方卽以本省之兵供本省之用足敷堵勦不得專恃客兵援救方爲妥善前據曹澍鍾奏石逆大股注意川境已諭該署撫如該逆竄出粵界劉長佑一軍務須跟蹤追蹏並諭駱秉章飭令田興恕蕭啟江兩軍分途截擊曾望顏亦當偵探賊蹤飭屬迎頭堵勦以殲醜類而安邊圉將此由六百里諭令知之○予四川陣亡訓導易良直祭葬世職○壬申諭內閣有鳳等奏川省土司屯番籲懇進京祝嘏一摺該土司等呈懇祝嘏具見悃忱但念

路途遙遠跋涉維勞均著無庸前來仍照舊輪流各按年班日期來京朝覲用示朕懷柔遠人優加體恤至意○諭軍機大臣等官文奏改設長江水師專營見已抽足兵數並籌辦大概情形一摺自九江克復全楚肅清以後卽經官文檄飭陸路提鎮及通省各營視兵數之多寡分別按成於各兵出缺時扣畱額缺共計扣出馬戰守兵二千名以備充補水師一俟皖省蕩平卽改立水師專營所籌自係爲慎重江防起見惟據該大臣稱以扣存兵額月餉提歸新設水師之費於常川操防養贍尙恐不敷仍須另議酌增但不得過水勇征餉之數見在水勇每名月需餉項若干仍著該大臣查明詳晰具奏至兵丁既有額缺未便令其虛懸著卽行募補酌撥楊載福彭玉麟兩營調遣以資練習而助攻勦俟各省撤防時或設水師提督或先派鎮協統帶再由該督定議具奏將此

由五百里諭令知之○諭曾望顏奏軍務未竣請續辦按糧津貼  
以資接濟一摺川省連年籌解京外各餉暨本省糧餉防勦經費  
等項爲數已至一千數十萬兩節經該督等奏請辦理按糧津貼  
原原委齊開司有呈請將實堪嘉尚見在各路軍務未靖滇黔各  
匪竄入川境防勦經費所需甚鉅據曾望顏奏請於咸豐十年再  
行勸諭紳民續辦按糧津貼實屬萬不得已之舉第恐不肖吏胥  
藉端擾累著該署督嚴飭各屬查照舊章遴選公正紳耆妥爲經  
理不准假手胥吏致滋弊端其上中下戶之分儻該地方官高下  
其手蒙混侵蝕及有徵多報少等弊卽著從嚴參辦毋稍姑容庶  
於借資民力之中仍寓體恤民艱之意此項津貼銀兩俟收解完  
竣卽由該署督覈計多寡奏請加廣學額屆時再明降諭旨以昭  
激勸將此由四百里諭令知之○予江南陣亡遊擊蕭勝南等祭

葬世職○乙亥享太廟○予江南陣亡知縣丁炅祭葬世職○  
命山東巡撫文煜山西巡撫英桂各挑官兵二千名西安將軍托  
明阿挑官兵一千名綏遠城將軍成凱青州副都統恩夔各挑官  
兵五百名備各路軍營調用○命熱河都統常清密雲副都統玻  
崇武各再挑官兵五百名備天津防所調用○撥部庫銀二十萬  
兩解往天津防所濟軍餉○丙子袁甲三奏據撫臣翁同書函稱  
瓦埠地方大股賊眾於我軍克復臨淮之次日卽行撤退爲赴援  
鳳陽之計又據各路圍練稟報自前月二十日後逆首張落刑等  
四出搜括糧米招集股眾繞赴鳳陽城臣一面嚴飭兵練認真巡  
探一面分撥勁旅節節向鳳陽進剿以圖進逼圍攻乃甫築四營  
該逆於去臘三十及正月初一等日糾眾直撲營盤節經兵勇攻  
擊及各處練丁齊力協勦斃賊四百餘名並截獲賊運糧米一千

餘石該逆糧道已絕初二日臣督飭馬步各軍逼城進紮南門擁出悍賊數千分作六股前來猛撲我兵奮力抵敵復飛飭委參領色普清額等添調馬隊二百名繞出賊後奮勇衝突斃賊數十名餘眾驚潰我兵追壓三十餘里賊屍縱橫戌刻收隊次日黎明官軍仍逼城搶築營壘該逆見官兵連築十餘營恐成坐困遂由西南兩門先出悍賊千餘名直奔東面營盤我營槍礮齊開未容撲近城內復陸續出賊四五千名潛伏九華山後詭圖鈔我後路我兵列陣從兩頭鈔殺前進擊斃悍賊數十名馬隊搶上山岡迎頭壓下中路馬步賊眾不能抵抗遂卽敗退兩旁賊股亦被我兵步隊衝爲數段拋旗棄械四路奔逃我軍奮力追勦直將敗賊壓入西門統計斃匪三千餘名生擒一百二十餘名奪獲器械無算臣查鳳陽踞城壘受痛創其勢已蹙見仍飭諸軍添營合圍以圖克

復

上諭

內閣

六

官軍逼攻鳳陽踞賊連獲大勝賊勢已極窮蹙著袁甲三督飭各軍合圍進攻迅圖克復○袁甲三奏天長踞賊未卽就撫惟懼西路官軍分勦時思逃竄得旨該逆反覆無常未必非緩兵之計固應相機勦除若仍真心悔罪獻城殺賊亦可准其投誠○丁丑諭內閣吏部奏遵議歷任河南巡撫藩司各員處分一摺河南一省歷年欠解京餉爲數甚鉅節經戶部奏咨飛催置若罔聞實屬任意延宕前任河南布政使今升河南巡撫瑛桀著降補陝西按察使仍帶降二級畱任處分見任河南布政使祥裕著改爲降二級畱任並降爲三品頂帶前任河南巡撫調任山西巡撫英桂升任直隸總督恆福均著照部議降二級畱任以上各員所得處分均不准其抵銷○諭軍機大臣等文煜奏遵籌海疆布置情形一摺據稱山東海岸迤長三千八百餘里武定等府均

屬濱海惟青州處各府之中擬令該滿綠各營勤加訓練何處有警卽由該副都統及該營將官帶往何處救援其餘文登等營官兵同大沽口新設防兵一體會籌堵効登標及文登營水師爲數無多應暫行撤歸陸路仍由省派兵四百名前往登州交該鎮會逢年統帶併原有官兵以一半守城一半守險並勤加瞭探如該府所屬及萊州有警亦卽分撥策應仍勸諭紳民辦理團練互相保衛等語所籌尙屬周密著卽照所擬認真辦理其各營官兵應如何勤加訓練以期得力卽著文煜嚴飭該將弁等實力講求毋得視為具文以致臨時貽誤至所稱煙臺等處濱海居民有不能辦團者卽令遷進內地自係爲煙戶稀少處設法旣難於團練不若令其遷移內地以免侵擾失業前因各路軍務未竣曾諭令恩  
於青州德州駐防兵內挑選五百名並令文煜於該省各營內

挑兵二千名一併聽候調遣見在青州兵既以防海此外綠營兵二千名及德州兵丁仍著文煜會同恩夔如數挑選認真操練儻撫匪北竄即可用以堵勦以備不虞將此由四百里諭令知之○以慶廉爲河南巡撫雷以誠爲陝西布政使由按察使還○以紳民捐助勇糧永廣河南鄧州學額五名○壬午 上幸圓明園○癸未

諭軍機大臣等本日據曾望顏奏另股滇匪距川甚近已飭知府帶勇回滇堵勦各等語滇省界內老鴉灘黃毛壩柿子壩豆沙關一里壩兩河口等處有匪首馬沅盛韓大耶楚老五陳大耶李偏鬍子簡大耶業二大耶各聚眾數百人在橫順一帶地方盤踞均距川甚近並牛皮寨有匪首羅四板枷率眾百餘人夥同各匪欲逆首李短搭搭之弟李小花么在牛皮寨老巢亦有蠢動之意業竄川疆又井底壩喇匪羅新大耶帶匪二千餘人欲赴青山合夥

經曾望顏答明張亮基等並飭令來川助勦之雲南前任知府夏廷楫帶所部得勝練勇馳回滇省先將牛皮寨一帶入川各路要隘堵禦並將滇省界內匪徒以次進剿但兵力甚屬單薄前次竄入川省之滇匪均已由敘州合股上竄至嘉定犍爲一帶各路官兵亦併力馳赴上游其下游川滇交界地方未免空虛該匪難保不乘隙竄擾覽奏殊爲可慮著張亮基徐之銘迅速調撥精兵揀派得力大員管帶馳往牛皮寨等交界地方探明賊蹤所向會合夏廷楫所帶之勇迎頭截擊分路埽蕩毋令闖入川疆致令蔓延爲患將此由六百里諭令知之○諭有人奏各關稅課本有定則近因洋藥收稅關津處所多設海役巡查往往一衣一履之漏報罰至盈千累百且有得錢賣放之事稅款仍難足額其弊各關皆然而杭關爲尤甚請明定罰款章程無任胥吏舞弊再地方水旱

偏災奉有蠲緩諭旨州縣官必先期加緊催科故意遲貼贍黃以便侵蝕卽如咸豐八年浙東被賊蹂躪西安松陽永康武義克復之後知縣匿貼贍黃是其明證等語奸商偷漏例應議罰然使任聽胥吏高下其手則徒爲行旅之累而於國課仍無裨益至被災被擾之區蠲緩錢糧事關民瘼儻任不肖州縣匿貼贍黃致膏澤不能下逮尤爲大干例禁著羅遵殿按照所參情節嚴密查訪如杭州各關寶有以罰款爲名肆行舞弊及西安等縣果有匿貼贍黃之事卽著嚴參懲辦以儆其餘至罰款章程應如何明行榜示使胥役無從影射蠲緩贍黃務使徧行張貼以期實惠及民之處並著該撫實心整飭毋得視爲具文以安商旅而蘇民困將此諭令知之○以四川擊賊滇匪出力賞已革總兵官虎嵩林四品頂帶○甲申諭內閣前據御史林之望奏懷遠民人胡文忠呈稱勝

保酒色行樂李世忠滋擾滁來翁同書保升降匪之知縣王啟秀等並道員黃元吉不借餉銀以致懷遠失守及縱兵搶掠設卡剝民等情當經降旨交和春何桂清查明具奏茲據奏稱委員前往密查勝保自蔚塘前赴盱眙雇坐民船該船戶帶有眷屬遂有耽於酒色之謠李世忠防守滁來因軍餉無出設卡抽釐其事尙出有因以致人言訛傳應無庸議至翁同書保升知縣王啟秀並主薄顧長源一節王啟秀係因辦團出力經傅振邦保升知府顧長源於懷遠解圍案內經福濟保升知縣與何桂清衙門卷據均符翁同書並非原保之人王啟秀顧長源亦無降匪通賊之事黃元吉帶兵無餉因在定遠等處設卡抽釐仍多不敷並無餘餉援救懷遠迨臨淮失守兵勇逃散黃元吉勢難彈壓既經和春等查明翁同書並無濫保匪人黃元吉亦無不借餉需各情均著免其置

議惟勝保退守蔣塘正當軍務緊急之時各將弁前往慶賀生辰  
卽當拒絕乃復給以酒食實屬不知遠嫌勝保著降爲副都統候  
補仍著督辦河南勦匪事宜以觀後效○和春奏查金陵北岸九  
洑洲爲南北往來水陸要道自咸豐四年洪逆分遣死黨紮營洲  
上內蔽金陵外通大江出入自由必須攻克此洲斷其江北要害  
全局方有把握正月初八日張國樑部勒各軍剋期大舉陸路則  
總兵馮子材爲左翼總兵張玉良等繼之總兵黃靖爲右翼副將  
楊福增等繼之張國樑親督小隊往來策應水路則總兵黃彬副  
將賴鎮海參將郭定猷曾秉忠等管駕戰船由三山江面順流而  
下同時駛擊初九日官兵水陸並進直薄浦口沿隄賊壘人聲鼎  
沸烈燄飛騰賊倉卒未測我師多寡但於牆內開槍抗拒浦口九  
洑洲一帶又出悍賊數股三面來援馮子材等分投迎勦鏖戰約

一時許張玉良等後隊踵至縱橫馳驟所向披靡士卒無不以一當百逆眾大潰張國樑指揮副將韋明堂等乘銳蹙之一路逆屍枕藉官兵直擣逆巢黃彬賴鎮海等帶領水勇沿江轟擊水師總兵陳國泰率領師船駛進九洑洲聯絡聲勢該逆面面受敵首尾不能相顧陶茂森等爭先奪壘大眾蟻附而上轟殞悍賊數千名當將逆壘八座逆卡十餘座一律攻克馘取首級千餘顆生俘百餘名九洑洲附近逆蹤全行燬滌張國樑派馮子材等因壘爲營仍飭水陸官兵會攻九洑老巢我軍更番休息晝夜輪流轟擊斃賊甚多賊復拌死抗拒張國樑嚴飭各鎮將竭力環攻臣等瞭見江北業已得手又派提督王浚挑選精銳一千名渡江督戰初十日馮子材張玉良等攻其左黃靖楊福增等攻其右王浚率所部包截其前張國樑親督馬步勁旅隨後接應官兵人人奮勇沿江

戰艦密施大礮水陸一擁而進逆眾踴裂自相踐踏擠溺及轟殲者不下七千餘人卽於初十日卯刻攻復九洑洲老巢接獲大礮數十尊擡槍器械無算所有附近逆壘當卽派兵填築以扼金陵西北要衝惟金陵合圍後上游逆黨聞此消息必以全力赴援或就近北犯儀揚或渡江南趨滬墳使我備多力分均在意計之中臣已飛咨李若珠鄭魁士等加意防守一面由張國樑親駐北岸督防水陸將士隨時扼勦外則杜其救援內則防其衝突以冀早拔根株至此次攻克逆巢水陸鎮將無不身先士卒躬冒矢石用能所向無前合無仰懇天恩先行獎勵以招鼓舞上諭軍機大臣等和奏官軍攻克浦口沿江一帶賊壘及九洑洲賊巢逆勢窮蹙請飭楚皖各路官軍乘機進剿各等語九洑洲爲金陵水路出入咽喉今爲官軍攻克已成合圍之勢惟浦口六合天長等

處踞賊尙多若不先加埽蕩恐九洲勢孤難守其地既爲粵逆  
所必爭尤當嚴爲守備以免掣肘著和春張國樑督飭將士先行  
進攻浦口並飭李若珠督兵進攻六合天長將江北賊援勦除淨  
盡既不至單臨險地而江北藩籬旣固金陵處坐困之勢矣至洪  
逆被圍情急必號召粵捻各匪赴援亟應各路進兵使其不能相  
顧以冀早收成效見在曾國藩已抵宿松胡林翼亦進繁英山皖  
北逆眾業已震懾袁甲三自攻克臨淮後軍威甚盛翁同書一軍  
進攻鑪橋亦漸得手均可迅速進兵至皖南池太等處爲金陵後  
路應援亦應急攻以分賊勢卽著官文曾國藩胡林翼袁甲三翁  
同書張芾周天受各飭所部將士剋期大舉實力進勦其楊載福  
水師並著官文等飭令與江南水師互相策應乘此機會各路攻  
勦既可乘虛規復各城並可使賊水陸各有牽掣不能回顧金陵

洪逆如檻獸金魚必早授首惟在各將帥不分畛域協力同心以期迅奏膺功同膺懋賞朕實有厚望焉將此由六百里各諭令知之○和春奏麾功同膺懋賞朕實有厚望焉將此由六百里各諭令知統兵大員乘機會勦得旨此時機會頗覺可乘惟在汝等各將帥不分畛域合力會勦庶幾早收成效○河南巡撫瑛棨等奏勦捕鹿邑縣聚眾滋事之寨長段樂山等訊明正法該縣知縣孫嘉臻隨同馳勦可否免其議處得旨該犯等踞寨抗拒實屬罪不容誅然歸咎於地方官不能隨時彈壓若果試辦之初皆係良民焉有此事此必係首鼠兩端時順時逆加以莠民惑眾禦冠適足以引寇亦可見地方官平日之恩信未孚該縣孫嘉臻尙能隨同出力著從寬免議○命漕運總督袁甲三爲欽差大臣督辦安徽軍務○乙酉諭內閣張芾奏投誠義勇著有勞績懇請獎勵等語義勇

韋志俊等上年自池州統率部眾獻城歸順旋因賊眾兵單池城復陷茲據張芾奏稱韋志俊在徽州一帶隨同官軍屢著戰功見仍禁營雷湖黃嶺等處助剿洵屬深明大義韋志俊及其部下尤爲出力義勇著張芾酌量保奏候朕施恩以爲自拔來歸奮勉立功者勸○諭軍機大臣等傅振邦奏捻匪圖竄東豫請飭各該省嚴密堵禦等語袁徐等均撫匪因傅振邦卽欲進攻築壘死守一面裝旗出竄圖擾東豫並已有馬步賊千餘人竄往西北碭虞一帶傅振邦雖已派出馬隊探信跟勦惟繞道追蹤深虞落後自應東豫兩省速籌會合堵勦以杜竄越著文煜德楞額瑛棨關保各就本省防邊兵勇調派精銳探明賊蹤迎頭截擊不得徒事株守東省如郝上庠黃良楷等兵勇爲數較多尤應不分畛域出境迎剿豫省屢經匪眾蹂躪此次不得再令竄擾瑛棨尙未交卸仍著

與關保悉心籌辦毋許稍涉鬆懈致干重咎將此由六百里各諭令知之○雲南提督傅振邦奏竄賊擊退賊巢宿北一路肅清並飭總兵官博崇武遊擊劉蘭馨等統帶兵練由宿南相機攻取兼顧徐宿藩籬得旨博崇武劉蘭馨雖於五鋪截勦並未扼其回竄似此處處落後無怪乎該逆愈聚愈多○丙戌諭軍機大臣等張亮基奏回匪占踞大理等處請飭傅振邦趕緊到任等語雲南迤西回匪久踞大理郡城負嵎抗拒亟應痛加勦洗該督委福光護理提督篆務辦理數月未有成效請飭傅振邦赴任自係爲該省軍務緊要起見惟傅振邦見在堵辦徐宿勦匪事宜正當喫緊之際未能卽赴滇省張亮基見委記名總兵褚克昌前往接辦著卽飭令該員督飭兵勇實力攻勦俟徐宿勦擒戩事再令傅振邦馳赴滇省徐之銘片奏密陳陝西候補知府張向宸迭著戰功不敢

沒其勞苦等語張亮基之子張向宸旣能帶練打仗立功自應覈  
其勞績奏請獎勵不必因其係大員子弟歸入密奏著該撫查看  
該員如續有戰功卽據實保奏候朕施恩將此由六百里諭令知  
之○雲貴總督張亮基等奏黔省撥借銅斤見在滇南無可撥運  
應由黔自行籌採得旨該部議奏黔省軍餉兵糧尙且不繼焉有  
餘力再籌銅本以兼轄省分尙如此歧視總由習氣未化也○袁  
甲三奏擒逆踞守鳳陽官兵步步進逼惟西面尙未合圍突於正  
月初四日由西門出賊二千餘名分撲營盤另於南門出賊千餘  
人猝命衝撲兵勇分投迎剿西面之賊先經該鎮道等壓退擊斃  
二百餘名南面之賊經苗沛霖親督各隊刺斃無算穆騰阿飭馬  
隊繞路鈔襲賊後逆勢不支回奔入城統計先後斃賊八九百名  
奪獲槍礮器械五百餘件生擒悍賊一百二十餘名該逆被創不

出我營已禁過西面將次合圍初八日賊由西門潛出二三千人  
搶築土圩各營兵勇奮力撲擊立斃悍賊百餘名餘匪敗退城中  
我兵卽將土圩四座立時平毀旋據練總周日庠等稟報初十  
一十二等日各齊練丁於殷家澗等處截擊定遠援賊並攻破米  
家圩謝家圩兩處賊巢共殲斃一千餘名奪獲賊糧九百餘石器  
械無算又據探稱明光踞賊糾合黨眾欲由東路來援當派參領  
恆德守備許保清等分帶水陸兵勇相機扼勦十一日許保清等  
由北面賊卡直闖而進逆眾猝不及防我兵奮勇勦殺砍斃逆匪  
三百餘名奪獲槍礮旗幟無數遂將明光克復餘賊膽落俱向澗  
溪奔逃臣查官兵圍攻鳳城連營五十餘座加挑長濠該逆已如  
釜底遊魂見飭各軍加意防範並多發偵探總期力杜外援斷絕  
聲息俾該逆糧盡力竭自可一鼓殄除報聞○予陣亡知州慶安

等祭葬世職○丁亥諭內閣吏部奏遵議失守各員處分一摺山  
東省秋審情實孟傳冉一犯業經惠親王等覆覈減等所有原辦  
錯誤之前任山東巡撫見任太常寺少卿覺羅崇恩著加恩改爲  
降二級畱任不准抵銷六年無過方准開復山東按察使葉圭著  
照部議降一級調用不准抵銷前任山東布政使降補直隸按  
察使吳廷棟著降一級畱任六年無過方准開復前署濟東泰武  
臨道撤任濟南府知府余榮著於補官日降一級畱任六年無過  
方准開復會勘覆覈之刑部郎中今升浙江嘉興府知府邊葆誠  
著降三級畱任八年無過方准開復刑部堂官大學士桂良尙書  
瑞常趙光侍郎靈桂齊承彥前任侍郎今授伊犁參贊大臣景廉  
前署侍郎禮部侍郎楊式穀均著照部議降一級畱任四年無過  
方准開復以上各員所得降畱處分均不准查級議抵○官文胡

林翼自國藩奏臣等探知逆首陳玉城糾聚捻首龔瞎子等在潛山縣屬之地靈港東西兩岸築壘二十餘座意將分路上犯以解太湖之圍副都統多隆阿與總兵鮑超商議分路進兵當派馬步隊由西路進剿又派協領西林布馬隊與開化五營步隊由中路進剿多隆阿親率弁勇由東路進剿以西中兩路馬步各軍直趨地靈港而以西路一軍分繞賊壘之後腹背夾擊該逆悉眾抗拒多隆阿鮑超指揮兵勇奮力衝擊當將東岸賊壘十一座全數踏平斬殺悍賊無算適山嶺賊眾蠭擁而至西林布率隊直入城中擒斬多名遂被數槍陣亡西岸賊壘亦經喀爾庫率同馬步兵勇連踏數座斃賊甚夥逆眾潰逃喀爾庫匹馬當先且追且殺被伏中殲陣亡是役鑿戰五時之久斬賊不下六七千名副都統銜協領西林布喀爾庫轉戰數省身經百仗所向有功此次力戰捐軀

深堪憫恤仰懇

天恩飭部照副都統例從優議卹又陣亡之儘

先參將吳明亮請照參將例從優議卹

上諭西林布喀爾庫均

著照副都統例從優議卹吳明亮著照參將例從優議卹

○諭軍

機大臣等據駱秉章奏皖賊上犯急須策應請調蕭啟江全軍改

道援皖固鄂以顧全局一摺皖北粵捻各匪窟聚潛山一帶悉力

上犯石逆復自慶遠分股由慶遠趨柳州南路並由富川竄入楚

境探有賊謀由湖南廣東邊界回竄江西等語見在張運蘭一軍

越境追剿在湖南江華藍山邊界距省較遠病尚未痊未便遠調

著卽畱於湖南所有蕭啟江一軍旣據稱添募兵勇由水路赴常

德陸路趨沅州相機前進不日可到如果皖北粵捻各匪大舉上

犯卽飭令蕭啟江改道赴鄂以資攻剿儻皖鄂軍務稍鬆應仍令

蕭啟江一軍由荆宜入川以保完善之區著官文曾國藩胡林翼

通諭全局妥商辦理毋誤事機本日據官文奏黑龍江調撥西丹戰馬到楚日期分別撥赴前敵等語皖省粵撫各匪分途上犯攻勦喫緊著官文將新到西丹均勻分撥各營北路一軍尤爲緊要自宜多爲撥赴以杜北竄前諭官文等令李續宣由光固潁州繞出懷蒙以北不至驅賊北趨嗣據胡林翼奏李續宣因母病假歸著官文等迅飭李續宣一軍赴鄂以便由光固一帶進兵堵賊竄豫之路所有西丹馬隊卽酌量抽分交李續宣統帶以資截勦毋稍延誤將此由六百里各諭令知之○調聯英爲山東按察使仍署漕運總督以湯雲松爲江蘇按察使由蘇松常鎮太道遷○予安徽陣亡協領薩林布等祭葬世職○己丑諭內閣刑部候補主事何秋濤呈進所纂書籍八十卷著賜名朝方備乘此書於制度沿革山川形勢考据詳明具見學有根柢何秋濤著加恩俟補缺後以員外

郎卽行升補並著在懋勤殿行走毋庸常川入直○以江西軍務  
肅清免在事鎮將等前失守處分○庚寅予江西殉難同知恩書  
祭葬世職○辛卯諭內閣前因吏部議奏刑部堂官京察保送不  
實處分所引例文尙未允協其兩次出考各堂官又未分晰聲明  
當交端華彭蘊章另行覈議茲據奏稱援照嘉慶年間成案議以  
降二級調用該堂官於京察大典濫行薦舉不諳本部例案之員  
實屬咎有應得惟念相習成風不獨刑部爲然此次姑從寬宥所  
有濫保之刑部堂官大學士桂良前任刑部尚書調任禮部尚書  
麟魁刑部尚書趙光前任刑部左侍郎今任工部侍郎國瑞左侍  
郎齊承彥前任右侍郎今任鑲白旗蒙古副都統孟保並覆帶出  
考之刑部尚書瑞常左侍郎靈桂署右侍郎宗人府府丞厲恩官  
均著加恩改爲降二級留任不准抵銷其兩次出考之堂官著查

取職名再行罰俸三箇月以示區別亦不准其抵銷嗣後每屆舉行京察之期各部院堂官務各慎選賢能不得以劣員充數儻敢再行濫保一經查出卽行責降不能再邀寬典也○諭軍機大臣等勝保奏蒙毫捻匪猖獗亟宜增調重兵扼禦歸德及永城一帶與鹿邑官軍互爲聲援然後簡練精銳與徐宿諸軍出境會剿懇請飭撥吉林黑龍江並西安馬隊及直隸等省步隊赴豫調遣並以安徽軍營馬隊尙多如能抽撥五百名於麟瑞薩薩布慶善克蒙額四人中派委兩員管帶赴豫則吉林等處亦可少爲抽調各等語直隸及陝甘兩省官兵迭經調撥出征其吉林黑龍江馬隊調赴各路軍營者爲數尤多均難再行抽撥勝保見在督辦河南剿匪事宜兵力單薄亦屬實情所有德楞額軍營馬隊五百名前因袁甲三奏進攻鳳陽需兵准其暫畱該營儻北路緊要卽行撤

回韓莊著袁甲三翁同書察看情形如可無須此項馬隊卽於麟瑞等四人中派委一二員管帶前赴河南交勝保軍營調遣將此由六百里諭令知之○王辰特普欽等奏查明鄂倫春一項人等向分五路有庫瑪爾畢喇爾並墨陵阿鄂倫春雅法罕鄂倫春等項名目總歸布特哈總管管理其人散居黑龍江右岸一帶山野以捕獵爲生每年秋後往黑龍江左岸外興安嶺以內捕打進貢貂皮至次年春間仍回黑龍江右岸捕牲爲業先擬設法收羅營加防範因此項牲丁已於九年冬季外出捕獵春融卽應交差未便拘回虧課此次又派委員會同前派往之副總管通格等籌辦擬於本年春季交差之後卽將此項牲丁收羅團聚分布要隘可期緩急應用奏入 上命照議辦理○乙未 上還宮○是月展綏直隸安州等五十二州縣被災地方新舊額賦給固安貧民口

糧展陝西吳堡縣原緩帶徵兵糧蠲緩山東臨清等五十七州縣  
被水旱蟲雹本年額賦有差

二月丁酉 上御經筵○官文胡林翼曾國藩奏九年十一月間  
逆首陳玉城以其悍眾旬串捻逆襲瞎子張落刑等自江浦廬州  
定遠分道上犯號稱十餘萬人臣等以抽撥太湖團師迎擊援賊  
爲先著十二月十六日賊分三路並進遂移鮑超之建營於潛山  
小池驛以當前敵移蔣凝學湘軍駐龍家涼亭多隆阿自以馬步  
各軍駐新倉而援賊已漫山徧野循潛山西太湖城東傍山爲  
營均偏小池驛橫袤三十里作壘百餘座十八日太湖城賊見我  
圍軍抽調前敵遂突圍以應援賊適蔣凝學湘軍尙畱四營未移  
遂設伏於東門誘擊勝之賊仍入城臣曾國藩以太湖兵單圍解  
大局可虞而迎擊援賊之師尤恐腹背受敵二十日抽派宿松十

營六千人交總兵朱品隆主事李榕馳赴太湖與唐訓方合軍駐於城之西北南三面而圍師之力乃厚次日小池驛援賊以大股圍撲霆營日夜不息總兵鮑超獨力禦之翼日多隆阿鮑超蔣凝學各軍約分三路迎擊踏平賊壘十三座斃賊約六七千名官軍焚燒賊壘而不忍延燒民房伏賊豫藏民房中我軍深入爲所包鈔自己至西血戰縱橫再接再厲賊始敗退整隊回營而我軍馬步陣亡亦六七百員名賊勢專趨小池驛二十四至二十八九等日更番疊進圍逼霆營參將蘇文彪等當賊壘之衝賊匪槍礮環攻子落如雨鍋帳均破士卒傷痍志氣彌厲以孤軍力抗十倍之賊自誓不退一步不棄一壘臣曾國藩加撥長勝平江等營三千人並順字營馬隊馳赴太湖而抽唐訓方一軍赴援小池驛又調曾貞幹等分赴新倉及太湖等處調喻吉三等營赴潛山之羅溪

河以顧我軍後路多隆阿督隊爲霆營護軍三十日派前營參將楊朝林駐霆左營之壘移霆左營於霆中營暫行養傷以前營換入霆左營遇賊之衝士卒續有傷亡勇氣百倍正月初六日唐訓方移營於蔣凝學鮑超兩軍之中以資聯絡多隆阿亦派右營參將王可陞駐霆左營之旁而令霆左營仍駐原壘馬步各軍忿與賊戰右營之壘卽日而成訓營之壘未成而賊已進逼我軍遂合築新倉多隆阿於十二日復派前中兩營移築小池驛次日派勝勇營駐小池驛之南臣曾國藩飭抽調太湖七營派總兵朱品隆馳赴新倉以資援剿初賊之西犯也聲言北竄壽州大安鄰境之霍山等處士民震恐臣官文等已派步兵五營馬隊四百人馳入霍山樂兒嶺大隊且持重不發俟賊情畢露而後起而乘之潛山之天堂鎮爲太潛英霍舒桐六縣之關鍵萬山叢薄雄據皖疆此

乘閒出奇之要道也賊匪力爭此險我軍均已擊退密飭知府金國琛領撫湘十四營會同前駐天堂之九營間道疾趨攀山而行時則積雪載塗士卒遄征不憚行役之苦閱十日乃出潛山之高橫嶺仰天庵從萬山深處俯視平原均在目中已可拊其背而扼其吭遂密與多隆阿等訂內外夾攻之約初十日金國琛率各營駐仰天庵一帶居高臨下小池驛龍家涼亭諸軍亦在望中十一日賊分四大股來撲攀援而上聲震山谷金國琛飭各軍靜鎮以待賊乘大霧未收潛至山腰我軍驟起撲之或迎擊其首或橫截其腰賊遂大敗死者不計其數參將余際昌等九營已在高橫嶺出隊擊賊金國琛因令各營合攻近營之賊壘盡破之計斃賊三千餘名生擒四百餘名此次逆首陳玉城嘯聚廬州而定遠舒城桐城廬江三河浦口六合各路之賊應之急援太湖欲以梗阻楚

軍仰賴 天威勦辦得手仍飭各軍慎密戒備相機進取所有出力將士仰懇 天恩准其擇尤彙案保奏以勵戎行 上諭內閣此次粵匪陳玉城勾串捻逆由江浦廬州等處上犯太湖經鮑超多隆阿蔣凝學各軍分路迎擊踏平賊壘大獲勝仗所有出力各營將士著准其彙案擇尤保奏○諭軍機大臣等官文等奏請飭催各省協餉等語湖北入皖之軍共計六萬人分布各路上年十二月間官文因欠餉已近百萬奏請飭催陝西山西四川江南浙江等省按月協濟餉銀當經批令戶部查議速奏茲據該大臣等奏稱各省並無起解日期見在楚軍需餉甚亟設有貽誤關繫非輕除山西省應解餉銀二萬兩改撥天津外其餘該省應解湖北餉銀仍著英柱迅籌起解並著曾望顏惲光宸羅遵殿譚廷襄按照部撥數目迅速解赴湖北軍營以資接濟將此由五百里各諭

令知之○戊戌祭 大社 大稷○庚子 上幸圓明園○袁甲  
三翁同書奏查鳳陽府縣兩城踞逆見官兵連營增濠計窮死守  
張落刑自敗竄定遠後糾約悍黨志在報復解圍臣袁甲三飭各  
營加意嚴防臣翁同書亦督兵勇圍攻鑪橋以分賊勢正月十九  
日南路援賊萬餘齊赴鳳城先於梁家岡地方築壘四座爲步步  
接應之計二十日馬步悍賊夾擁而來距我營里許紮定逆首張  
隆見援賊踵至卽於縣城擁眾登陴徧插旗幟呐喊助勢我軍分  
別戰守而以馬隊暗伏山後總兵滕家勝等督飭各營嚴防內賊  
衝突副將黃開榜等率隊進擊副都統穆騰阿揮令馬隊從山後  
突出先將兩翼馬賊壓退步賊立足不住我軍乘勢壓下追殺四  
十餘里直至梁家岡以南賊屍枕藉該處新築賊壘一律平毀統  
計生擒斬斃之賊約六七千人二十一日府城賊目鄧政明等潛

至我營乞降

臣

袁甲三卽於二十二日親赴鳳陽城外調齊各隊

示以兵威並因總兵張得勝前隨勝保攻勦本與張灝認識遂密

飭該鎮至縣城外計誘張灝擒縛來營

臣

袁甲三暫令緩死勒令

將城內槍械繳出並縛獻兇悍頭目以翦餘孽城賊鄧政明等卽

於二十三日將槍礮馬匹全數繳出並捆出僞丞相張先等十四

人正法

臣

袁甲三令投誠之人指出悍賊姓名處斬其餘脅從分

別遣回歸業府城之賊旣除縣城賊眾猶復死抗當飭該鎮道等

將張灝綁赴縣城外凌遲梟示二十五日令各營四面環攻另於

附城山上安放大礮二十餘尊連向城中轟擊斃賊數百名並據

練總蔣魁龍等將乘閒逃出之僞軍師趙玉奇捆獻來營正法縣

城各匪從此不敢復踞夜半環跪乞降次日捆出步賊頭目常四

馬賊頭目邵灝倫等十七人正法時

臣

翁同書亦到臨淮遂商同

傳令將兩城之人全行放出分別點名又誅兇悍三百餘人其餘一律遣散臣等卽飭署廬鳳道黃元吉署鳳陽府知府秦榮署鳳陽縣知縣高啟林等隨同各營鎮將入城安置查鳳城距淮河十餘里南爲廬定門戶北爲宿徐屏藩捻逆與粵逆勾連專恃此兩城爲樞紐所以張漋踞守兩年糾集各路悍賊併力死拒官兵乘臨淮破竹之勢移師圍攻自正月初二日以後大小十餘仗疊獲全勝殲賊不下兩萬此次援賊大至痛受懲創遂致計無復出延頸待誅張漋旣生擒就戮其新隨悍黨亦翦除淨盡此皆仰賴

皇上威福訓誨周詳實爲臣等初念所不及所有在事出力員弁兵勇團練可否由臣等查明具奏出自 聖主鴻慈 上諭內閣

袁甲三督師皖省月餘以來連次克復地方城池生擒積年逆首翦除羽黨實屬調度有方著加恩賞穿黃馬褂以示優獎並著督

率得勝官兵節節掃蕩盡殄賊氛在事出力文武兵勇團練均著  
該大臣查明保奏候朕施恩○袁甲三奏查逆首張灌卽張元灌  
兇悍狡猾自倡亂以來攻陷城池戕害官弁早爲國法所不容上  
年經勝保曉以大義設法招撫原望其悔罪投誠立功自贖乃該  
逆詭詐多端陽順陰叛上年定遠之陷實係該逆率眾親攻東門  
並勾結張落刑龔得等同力合攻以致定城不守數百里生民塗  
炭該逆實爲禍首勝保交卸時曾與臣面商屬以應勦應撫斟酌  
辦理臣接任後仍復示以信義責令擒斬張落刑藉以贖命乃臣  
於正月初間密遣鳳民潘田等潛入府城作爲內應謀殺張落刑  
並獻出府城經張灌查知信致張落刑以致潘田等卽時被害若  
非該逆洩露機謀則張落刑早經授首且逼令兩城逆黨堅守待  
援此次定遠援賊來至營邊若非我軍一鼓作氣登時將逆眾擊

敗該逆勢必齊出來擊大局有無決裂尙未可知二十二日將該逆拏獲臣親自驗訊蓄髮並未全薙逆迹昭著共見共聞是以凌遲處死兵民稱快至擒殺兇悍頭目張先等二十二人內有受僞封者二十一人張灝係僞封鍾天福訊據供稱粵逆以安福燕豫侯爲五等最上僞封授獲該逆所受洪逆僞封鍾天福張元灝僞印一顆隨摺齊送軍機處備查再府城投誠之鄧政明等七人從賊已久見雖被困情急同謀獻城亦僅足贖其前愆未便遽予獎勵臣等見令畱營責以隨勦立功藉觀後效 上諭本日袁甲三奏克復鳳陽府縣二城業經降旨將該大臣及出力人員分別獎勵至投誠之裏脅黨與如果真心悔罪立功自效疊經酌量加恩寬其既往予以自新若逆首張元灝屢次假託投誠實則陰謀助逆上年定遠之陷該逆率眾攻城本年正月鳳陽民人潘田等謀

爲內應遭其戕害實屬罪不容誅此次我軍一鼓作氣將該逆拏獲凌遲處死洵足以彰國憲而快人心除賊目張先等二十二人一併正法外其投誠之鄧政明等七人從賊已久見雖被困情急同謀獻城僅足贖其前愆未便遽予獎勵著照該大臣所請畱營隨勦以觀後效嗣後各路軍營投誠賊目如有陽降陰叛首鼠兩端與張元漋情罪相同者斷不准稍事姑容致稽顯戮若真心能洗心革面投首獻城或打仗立功卽隨時量予獎勵以示區別○貴州巡撫蔣霨遠卒予祭葬子候選郎中斯岱斯崧服闋帶領引見○以劉源灝爲貴州巡撫姚錫華爲雲南布政使鄧爾恆爲雲南按察使由鹽法道遷○以克復鳳陽府城賞守備張誠心巴圖魯名號前鋒慶亮光翎餘升敘有差○辛丑諭軍機大臣等德楞額奏總匪復逼東境續獲勝仗一摺前據德楞額奏正月二十六日將

竄擾東境捻匪擊退逃往江南邳州等境茲復據稱二十七日又有捻股從周家山頭一帶逼近東境前竄江境之匪復行折回會合撲擾得勝莊等處並有繼至大股分撲六里石巨梁橋萬年丁廟頓莊等處搶渡勢甚鴻張經該副都統督率兵勇及崑縣知縣都崇正添調民團堵禦先後斃賊千餘賊復分竄邳州梁王城渡口意圖偷越亦經兵勇過河擊勦仍向東南逃竄等語捻逆屢次擾及東境意圖北犯雖經擊退而該匪等尙有天暖春融分投搶渡之語著文煜德楞額督飭官軍實力嚴防北竄卽未能出境迎勦務須扼定各路要隘毋令該匪再行竄擾尤不許有一賊渡河而北其各屬團練亦飭各地方認真激勸協同官兵防勦德楞額擬請將黃良楷所帶之勇分撥各處兵力未免太單著與文煜會等妥辦毋使稍涉疏虞文煜另片奏勝保各行補額官兵東省防

勦突厥存營官兵實係無可再調此次皖省補額兵丁卽著准其暫緩調補將此由四百里諭令知之○陝西按察使瑛棨奏謝降補恩得旨汝之才具頗可用惟在豫年久不能處處破除情面致未能大見振作見雖降補將來重領封圻務須自加勉勵不可自甘廢棄○壬寅諭內閣裕瑞英蘆奏浩罕額爾沁違旨逗留肆意行兇經弁兵殿斃一摺上年九月間裕瑞奏浩罕額爾沁阿布都剴里木到葉爾羌懇求進京朝貢原屬誠悃可嘉當經諭令裕瑞以本年各城伯克年班均已停止浩罕額爾沁亦應免其來京朝賀以示體恤如其顛憊必欲呈進貢物卽著賞收由裕瑞代遞來京朕仍頒給賞件敕書獎其效順之心茲據奏稱該大臣傳諭該額爾沁未能遵順逗留不歸並在回城恣意妄爲屢次捆毆軍民回戶口搶回民婦女恃強姦娶經該大臣飭令阿奇木伯克疊次

開導該額爾沁猶復抗違帶領安集延回子多人持械進城求見  
復經該大臣豫備貨物筵宴傳見將前奉諭旨詳爲宣示該額爾  
沁執意不從出言違悖該大臣當令阿奇木將其帶出詎該額爾  
沁肆行兇橫喝令從人各出刀斧先將弁兵刃傷十三名眾兵見  
其行兇亦將額爾沁等毆毆共二十五名奪獲刀斧存據該大臣  
卽令阿奇木伯克前往回城撫慰安集延貿易人等均屬安謐查  
獲額爾沁寓內據去本地回婦艾尼帕等十七名口訊取供詞並  
取安集延呼岱達供詞開單呈覽該額爾沁違旨逗留肆意行兇  
所爲不法已極經弁兵格斃實摺由自作前葉爾羌參贊大臣裕  
瑞葉爾羌參贊大臣英蘊未能先事防維究屬咎有應得均著交  
部議處仍著撫慰安集延回民人等各安生理毋致驚疑以緩邊  
圉○諭軍機大臣等本日據裕瑞等奏浩罕額爾沁在葉爾羌違

旨逗留肆意行兇經弁兵毆斃一摺該額爾沁違抗諭旨任意逗留所爲種種不法並放率眾持械進城面見該大臣肆行兇逆令其從人砍傷弁兵十三人該弁兵等抵禦致將額爾沁格斃二十五人固屬禍由自取第恐浩罕伯克欲圖報復從此起釁邊疆緊要應如何豫爲之防著扎拉芬泰不動聲色密爲籌備設或浩罕前來理論或竟稱兵犯順何以應之並著扎拉芬泰派委委員前往葉爾羌將此事啟覽本末查明具奏如裕瑞等所奏有不實不盡著奏參毋徇隱原摺及所奏安集延呼岱達並被據回婦等供單一件鈔給閱看將此諭令知之○甲辰諭內閣惠親王等會同軍機戶部奏酌加兵餉實銀並變通鈔票出入章程一摺京城各旗營兵餉自上年歷次搭放實銀以來該兵丁領項較前雖覺寬裕惟念物價仍未平減兵丁不免拮据除二成錢四成實銀照舊

放給外著加恩自三月爲始將應折四成票鈔改放三成實銀以示體恤至捐銅局收捐章程向係以錢折回見在兵餉旣加實銀則捐項亦應稍爲變通著准其於每兩內改收實銀二錢餘仍分別搭放鈔票等項其前經奏定六條九條捐項仍著照舊辦理此外如鈔本改放見錢及鈔票掣字停止與官票酌給寶鈔並止民號寶鈔之處均著照所請行經此次通盤籌畫兵餉各款均關緊要所有部撥款項並歷年欠解地丁鹽課開稅等項著各該督撫並各期監督照歷奉嚴旨並該部疊次奉撥銀數實力催提源源解部毋許稍有遲誤致干咎戾○諭軍機大臣等聯英庚長奏大股捻匪直撲清淮一摺已據袁甲三奏稱該營總克蒙額等統帶馬隊四百名副將向得聰等統帶步隊一千二百名馳往援剿並據傅振邦奏稱總兵田在田因探聞捻匪有竄擾清江之信業

已統帶馬隊馳赴清淮附近繞前迎截兼由該提督派出步隊一千五百名交已革副將胡元昌帶領由靈泗一路趕赴桃源等處探明賊蹤隨同田在田併力堵勦茲據聯英等奏稱馬步賊匪三萬餘人由桃源闖入順清河直撲清淮是賊勢極形猖獗恐兵力尙形單薄本日已諭令和春於揚州防兵內酌量派撥前往助勦矣以上各路官軍卽著聯英等催提前進會合堵勦並著嚴飭派出之副將馬國陞等分扼要隘毋令賊眾得以渡河一面知照田在田等務於桃源順清河一帶將賊眾兜圍擊勦眾而殲旗勿令蔓及清淮尤不可驅令北竄至衡陽蔣塘偏近天長亦關緊要一俟清淮情形稍緩卽著飭令鶴齡安勇等各回防所以免別有疏失將此由六百里諭令知之○諭聯英庚長奏大股捻匪直撲清淮請飭江皖各營迅派援師接應一摺逆捻大股由桃源闖入順

清河直撲清淮該處爲西北扼要且係揚郡後路設有疏虞關繫  
非淺昨據袁甲三奏稱已派克蒙額向得聰等統帶馬步官兵一  
千六百名馳赴清淮以西堵勦並據傅振邦奏稱總兵田在田已  
督帶馬隊馳赴清淮迎頭截擊並撥步隊一千五百名交已革副  
將胡元昌帶領由靈泗一路趕赴桃源等處隨同田在田併力遏  
截惟馬步賊眾三萬餘人恐尚不敷援應著和春張國樑就近於  
雷防揚郡官兵內迅速挑選精銳派委得力將弁馳赴清淮一帶  
併力堵遏毋令竄至清淮以保完善之區是爲至要將此由六百  
里諭令知之○乙巳署貴州巡撫海瑛奏黔楚官兵進剿鎮遠賊  
匪收復府衛兩城得旨此次收復府衛兩城惟在善撫其後迅派  
良員整飭諸務修繕城隍不可視爲緩圖○予貴州陣亡知府江  
炳琳祭葬世職建祠○丙午諭軍機大臣等前因喬松年奏江北

糧臺餉需請於附近省分按月指撥當經諭令戶部查覈具奏本  
日據戶部奏稱山西等省及淮安關應解江北餉銀積欠甚多請  
飭速解以資支放其江北地糧捐釐等項係歸該糧臺充餉應由  
司員自行催解惟聞江北軍營兵勇多不足數往往以少報多爲  
侵扣餉需地步請飭覈實裁汰等語除山西等省欠解餉銀業已  
諭令英桂等速行籌解外其淮安關欠解江北糧臺餉銀八萬餘  
兩著何桂清督飭該監督迅速籌撥卽行分起解交不得再事延  
宕其江北地糧捐釐及漕糧折價漕項銀兩並著何桂清飭令喬  
松年趕緊催提應用如有徵解遲延卽著嚴行參奏仍遵限報部  
以備查覈至軍營虛額前據和春奏稱曾與張國樑力爲清釐埽  
除積習惟當此庫款支絀之際未容以空言塞責所有江北軍營  
兵勇著和春將老弱充數者嚴行裁汰其江南各營募勇間亦有

虛額帶兵官侵吞餉銀爲肥己之計殊屬可惡並著和春查明參奏以杜虛榮上年和春親往常州與何桂清商議籌餉許乃剗又赴浙勸捐原爲速克金陵起見乃僅克九洑洲一處殊不滿意若不及早圖維因循日久以後餉需難繼和春身爲統帥其能當此重咎耶和春接奉此旨務與張國樑振刷精神力圖大舉迅奏膚功以副委任將此由五百里各諭令知之○諭前因兩淮鹽運使喬松年奏江北大營待餉孔殷懇請於附近省分按月指撥當交戶部查覈速奏茲據奏稱山西各省尙有欠解江北糧臺之款計山西積欠五十餘萬兩陝西積欠七十餘萬兩河南山東各欠解二萬九千餘兩請飭催解等語著瑛棨文煜英桂譚廷襄督飭各藩司將欠解江北軍餉迅速按月籌解以資接濟毋得再有延宕致干咎戾將此由五百里各諭令知之○工部奏庫存綵紬自道

光十年變價後迄今三十年之久朽壞過甚飭令管庫司員查照成案分別加減估值得旨此項變值物件止憑司員覈計尙非覈實之道著派肅順宋晉卽日前往認真查辦本屆年分雖較上次稍久惟所積愈多亦無草率減價之理必須全按市價涓滴歸公  
○戊申諭軍機大臣等傅振邦奏勦辦銅邳宿遷交界竄匪及劉蘭馨等渡滬攻克合圩並探聞東路竄匪有闖入清江浦王家營之信各等語捻匪圖撲清淮前據聯英等奏報當因袁甲三所派克蒙額等馳援之馬步隊一千六百餘名尙形單薄並諭令和春等就近於畱防揚郡官兵內挑選精銳馳赴清淮一帶堵遏竄路均未知可否趕到庚長雖督隊迎剿究屬賊眾兵單恐難抵禦況傅振邦聞捻匪有竄王家營清江浦之信更屬防不勝防著該提督卽飭田在田胡元昌等飛速前進確探賊蹤或會同各路援兵

合力兜剿萬不准令此股賊匪闖入清江浦一帶亦不可令其分竄滋擾該提督進攻袁圩附近各賊巢正在得手仍應督飭將弁乘勢攻剿毋稍鬆勁其另招請飭催山東等省餉銀已嚴諭文煜瑛棨等速行先籌銀各四五萬兩解往接濟山陝兩省亦令將弁解各款陸續解撥矣將此由六百里諭令知之○諭前因傅振邦軍營需餉孔亟當諭山東河南山西陝西各將應解月餉如數撥解其山東河南仍於每月十五以前解到河南除餉票外解足實銀二萬兩其各省新舊積欠銀兩並著各籌撥搭解茲據傅振邦奏河南月餉已欠三箇月正月以來各路餉銀杳無音耗兵勇日領雜糧數合數日不得一飽田在田師行中途屢因絕食聒噪大罵將形決裂等語見在捻匪猖獗傅振邦一軍直擣老巢應援各路總海臨渙韓村等處一鼓而下正可整軍前進掃蕩賊氛當

此事機得手之際豈容因糧餉不繼致誤大局著文煜瑛棨英桂  
譚廷襄仍遵前旨按月如數撥解並酌搭舊欠以資接濟山東河  
南距徐宿尤近並著文煜瑛棨督飭藩司無論何款先行籌撥銀  
各四五萬兩迅解傳振邦軍營毋許再行延宕如敢仍前玩懈貽  
誤軍情必將該撫及該藩司從重懲處不貸懷之將此由六百里  
各諭令知之○己酉諭內閣本年朕三旬慶辰業經覃敷闔澤並  
將王大臣分別加恩因念在京大員老親有年逾八十者祿養承  
恩康彊逢吉洵爲盛世嘉祥允宜特加恩賚用示朕錫福推恩至  
意○官文胡林翼曾國藩奏查逆首陳玉城糾眾十數萬力援太  
湖分股繞犯正月二十五日多隆阿率馬步各隊鮑超等率霆字  
各營會齊進逼匪眾蟻聚蠭屯馬賊馳驟尤爲兇悍多隆阿令步  
隊誘之賊果分股來撲我軍驟起回擊蔣凝學橫截之唐訓方尾

鈔之朱品隆扼之於右鮑超遏之於前多隆阿自率馬步衝堅陷陣從中路殺入賊遂大敗殺賊三千餘名擒斬賊目甚多次日多隆阿等籌分三路乘勝急攻之策東路爲小池驛鮑超以五營及趙克彰等二營出其左唐訓方七營出其右而以吉林黑龍江二起馬隊繞外以截竄賊西路爲羅山沖朱品隆七營由沖西進蔣凝學八營由沖口進而以吉林六起黑龍江九起馬隊繞外以截城賊中路則多隆阿之精選四營飛虎石營開化勝勇建威及親兵等營進攻而以吉林黑龍江八起馬隊由後策應多隆阿審察地勢自東堰口而西周圍袤廣二十餘里賊壘密如蠭房逆首陳玉城踞羅山沖內悍賊甚多正在列隊進攻山賊一齊擁出壓軍而陣勢甚兇猛我軍奮攻冲外之壘賊匪槍礮齊施我軍無一退卻多隆阿督中路西路各軍併力攻山奮呼直上蔣凝學連破冲

日賊卡攻入山內朱品隆越山而進多隆阿馬步各隊由賊壘槍  
礮之中衝突而前山賊紛紛敗竄擊斃無算東路小池驛之賊分  
四路抗拒約數萬人而田壠大股尤多鮑超親督霆營陳由立等  
由東路左面衝擊田壠之賊朱希廣趙克彰繼之唐訓方在東路  
之右見左面賊眾且悍而霆營獨當其衝又由右面撥四營助之  
堅戰二三十合賊遂回奔唐訓方各營由右面斜刺而來我軍合  
東西中三路追殺縱火焚燒將大小賊壘一百數十座頃刻平毀  
賊棚數百亦無一存者斃賊約七八千名生擒三百餘名正法奪  
獲槍礮軍械無數山內之軍經知府金國琛等於仰天庵戰勝後  
偵知銀硃塔一帶之賊盡移白沙畈小池驛等處我軍因於十八  
日進逼紅長山一帶賊壘二十日偵知廣福寨下之賊移入羅山  
沖其地爲小池驛後畈我軍又進逼太湖交界之玉房尖天頭山

甑皮尖等處並派兵扼紮潛山之水吼嶺天堂以重後路蕭慶衍等循甑皮尖而上朱品隆等由長山前進金國琛等由廣福寨山直下參將余際昌等由高橫嶺進至銀硃塔等處沿山兜擊其時山外馬步各軍正在得手賊沿山內竄而不虞我軍又由山內突出也奮力夾攻賊遂前後受敵奪路亂竄我軍縱橫截擊斬擒約三千餘名是夜金國琛等分率各營乘勝追勦至潛山河邊斃賊不少余際昌追賊至柏樹灣一帶擒斬不下數百名太湖城圍之師均臣曾國藩所部以總兵朱品隆主事李榕統帶管理臣官文每加派恆左等營曾貞幹等以助之正月二十二日城賊出隊東南隔山岡約二時之久欲渡河以窺我營大股遂由河邊包鈔而來曾貞幹派恆左恆右等營前往策應悍賊千餘死力抗拒曾貞幹督勇直前擊斃悍賊數十名張岳齡督勇繼至李榕督西門各

營併力痛勦復斃悍賊多名賊敗入城自是不敢復出日盼援賊接應二十六日援賊大敗李榕知城賊膽寒豫伏各營分路截勦曾貞幹以一營迅繞其前一營追勦於後多隆阿亦先於桃花鋪一帶派各營設伏是夜賊遁伏兵四起擊之太湖縣知縣蔡鍔亦率團練截殺擒斬尤多其未能逸出者盡數殲之遂將太湖城池克復是役也逆首陳玉城勾結各路悍賊大股十數萬而來非鮑超以三千餘人獨禦前敵傷亡千餘猶復血戰兼旬不卻一步不失一壘則援應各師必有緩不濟急之勢非潛山縣知縣葉兆蘭據天堂籌兵食以導楚軍則金國琛等軍無由聞道出奇以拊其背而扼其吭非宿松各軍如朱品隆等進圍太湖分扼羅溪河助剿小池驛則太湖圍師無由抽撥卽無以迎擊援賊非多隆阿去歲先克石牌制賊要害審機審勢料賊如神其馬隊之驍果步兵

之精強復苦戰彌月勤勞獨著則新倉小池驛糧道難通必無以  
破援賊而全大局今幸仰仗一天威各軍同心勳力合計各路殺  
賊約二萬餘踏平賊壘百餘座焚毀賊棚賊館數百處太湖城池  
同日克復此軍興數年以來僅見之大戰也其出力之副都統多  
隆阿等及陣亡之遊擊徐勝祿等相應先行分別奏請獎卹 上  
諭逆首陳玉城率黨力援太湖副都統多隆阿總兵鮑超等親督  
各軍分路鏖戰殺賊約二萬餘名平賊壘百數十座焚賊棚館數  
百座克復太湖縣城寶足以塞賊膽而快人心官文胡林翼曾國  
藩督軍進剿調度有方均著先行交部從優議敘副都統多隆阿  
著賞給頭品頂帶總兵鮑超著賞加提督銜佐領金順著以協領  
儘先補用並賞加副都統銜協領溫德勒克西著賞加副都統銜

○庚戌諭內閣戶部奏請嚴催粵商欠款一摺廣東省各埠商厯

年應輸帑本息銀前後共積欠至九十一萬三千一百四十餘兩之多經該部於道光二十九年咸豐元年屢次奏催分限完解又於七年該部查覈奏請將歷任運司以下催解不力造報遲延各職名送部覈議迄今未據登覆實屬延玩已極當此籌備庫儲之際豈容以有著款項任意稽延復一年伊於胡底著勞崇光耆齡督同該運司迅將前項逾限未完銀兩按照該部前後奏咨各案嚴定期限趕緊歸數催提解司專款存庫分年造冊報部聽候撥用不准再有滯欠並著查明歷任運司以下各職名送部覈議其歷任及見任各該督撫督催不力亦有應得之咎並著該部查取職名分別議處如此後仍不上緊實力催解按限咨報卽由該部將該督撫暨運司以下各官據實嚴參以重款項而倣疲玩○諭軍機大臣等據文煜奏捻匪被擊回竄東境肅清惟另股擾及

清淮郡城危急已調勇出境助勦一摺據稱前竄邳宿之賊於前  
月二十九日竄擾桃源該縣失陷逆眾已於初一日由王家營南  
竄清江庚長退至淮城與聯英固守文煜已飭黃良楷帶勇由桃  
源宿遷一帶拔隊前進著卽探明賊蹤何路緊急卽由何路進勦  
儻淮安業已解圍務須於後路相機設法兜截毋令北竄前諭和  
春於酉防揚郡官兵內挑赴清淮一帶併力堵遏見在道途梗阻  
未知文報能否直達金陵著袁甲三迅飭前派之營總克蒙額等  
統帶馬步隊傅振邦卽飭田在田胡元昌等帶兵直趨清江浦救  
援淮城並勿令該匪紛竄裏下河泰州等處以保完善之區德楞  
額見在韓莊與桃宿接壤卽距清江亦屬不遠著酌量情形如能  
分兵就近截擊桃宿一帶賊匪即可爲清淮廓清來路並可防竄  
入東境之路亦著不分畛域合力兜勦清江無城垣可守各路兵

到不難將該匪眾聚而殲旃將此由六百里各諭令知之○辛亥諭內閣本年朕三旬慶辰覃敷闢澤中外均霑因念文武大臣有年逾七旬精神強固供職克勤者洵爲熙朝人瑞允宜特沛恩施以昭優眷大學士桂良吏部尚書許乃普工部尚書張祥河均著加恩賞給太子太保銜鑲紅旗漢軍都統劉鈺之子驥騎校榮昌著加恩以印務章京卽補先換頂帶西安將軍托明阿之子候補參將敬文仍留直隸以副將用以示朕尙齒引年優禮耆臣至意○諭軍機大臣等昨因文煜奏捻逆擾及清淮當諭袁甲三迅飭克蒙額等直趨清江浦救援淮城本日據袁甲三奏稱捻匪竄陷清江援兵尙嫌單薄復添派馬步隊二千餘名交善慶等統帶前往助剿並撥礮船三十隻駛赴清江此項水陸官軍與克蒙額等軍如能會合田在田援剿之師奮力攻擊諒可力挫賊鋒清江爲

南北鎖鑰關緊江淮全局斷不容該匪久踞該大臣卽嚴飭所派各軍乘賊蹤未定迅速攻剿毋令盤踞至所稱伊興額與傅振邦不能和衷請飭會同田在田辦理徐宿軍務等語見在田在田帶兵馳援清淮旣未便折回徐宿且資望較淺伊興額未必肯聽其調度該副都統旣已病痊著卽馳赴袁甲三軍營責令帶兵剿賊傅振邦進攻袁圩正當喫緊之際實難前往清江仍應責成田在田等督兵赴援袁甲三以分路進兵地面遼闊請派傅振邦來營幫辦見在徐宿一帶匪蹤充斥斷非田在田等所能勝任俟徐宿崩潰再令該提督前往與袁甲三會剿可也另片奏請飭催山東河南等處新舊撥款已諭令文煜瑛棨按月搭解至淮安見辦防堵恐其自顧不暇可暫緩催解所請另撥有著之款十萬兩已交戶部速議具奏矣將此由六百里各諭令知之○諭袁甲三奏請

飭催東豫兩省欠解餉需等語各處應解袁甲三軍營月餉山東省僅解至上年九月計今已欠十萬兩河南僅解至上年十月計今已欠八萬兩而河南尙欠折漕銀三萬餘兩月需放款積欠甚多見當攻勦得手之際豈容以餉項缺乏致誤事機著文煜瑛棨督飭藩司迅將欠解新舊撥款按月籌解毋許再有延誤自干咎戾將此由六百里各諭令知之○王子官文胡林翼曾國藩奏查  
長壞太湖之潛山四面環河阻水該逆自八年冬復踞以來修城  
濬濠旁出肆擾正月二十六日我兵大捷之後小池太湖餘賊竄  
入潛城者萬數千人與城賊合力抗拒多隆阿會商諸軍以鮑超  
唐訓方等營搜勦各山匿賊而自率馬步同蔣凝學趙克彰等並  
約會知縣葉兆蘭督練乘賊大創輕騎裹糧逼城而壘師抵潛山  
距城數里立營該逆悉眾直前衝突多隆阿以所部步隊並建威

營攻其左蔣凝學以湘勇及新前後兩營攻其右多隆阿親帶馬隊直擊其前馬步並進斃賊甚多該逆猶拌死抵抗我軍勇氣百倍賊勢不支葉兆蘭督練襲擊其尾賊遂大潰多隆阿先以馬隊截其歸路該逆不敢入城巢穴既失賊愈狂奔馬隊追至桐城縣屬之青草塥沿途殺斃不計其數各營步隊搜殺餘匪卽於正月二十八日克復潛山城池 上諭內閣官軍攻克太湖後餘匪竄入潛山併力抗拒副都統多隆阿等督勇前進奮力迎擊賊遂大潰潛山縣城卽於正月二十八日克復所有在事出力之員弁兵勇及陣亡將士著官文等查明分別奏請獎卹○諭軍機大臣等曹澍鍾奏克復柳州府及柳城縣城石逆尙踞慶遠請飭肅啟江等迎勦並濱屬賊匪未靖見飭蔣益澧馳赴陽朔籌辦勦撫各等語肅啟江一軍前經官文等奏稱皖鄂軍務已鬆飭令由常德取

道入江徑赴川省此時萬難再令折赴貴州其田興恕一軍並據  
駱秉章奏稱如賊蹤未過都勦則令由靖州赴黎平古州截剿此  
時行抵何處尙未奏聞廣西石逆見距慶遠並於馬平等處分屯  
股匪著曹澍鍾卽飭劉長佑移得勝之師會合慶遠兵練進剿並  
知照駱秉章迅飭田興恕探明賊蹤迎頭截擊毋令闖入黔省窺  
伺蜀中方爲安善降補道員蔣益澧旣據該撫查明尙知愧奮派  
令前往陽朔接管湘勇並審察荔浦等處賊情分別撫勦卽著曹  
澍鍾嚴飭該員實心經理毋得再涉玩泄其餘派撥兵勇各事宜  
均著照所議辦理所請催山西等省餉銀本日已諭令各該督撫  
迅速籌解矣至竄擾川境滇黔各匪雖據曾望顏奏報疊經勦辦  
獲勝而匪勢仍形猖獗蕭啟江如已到川卽著曾望顏飭令會同  
川軍將彭涪及犍爲敘州等處竄匪實力勦捕石逆有入川之

信卽令出境赴黔與劉長佑等會期庶不至以有用之兵徒勞往返也將此由六百里各諭令知之○諭前據曾望顏奏四川已革赤水縣丞張長慶呈訴前任四川總督幕友吳香農並成都府知府翁祖烈之子候補知州翁道醇有藉端索贓情事當經降旨將翁祖烈先行撤任交曾望顏提集人證秉公嚴審本日據曾望顏奏該府翁祖烈因撤任不甘懷忿計告羅列入款經該署督鈔錄呈覽並請欽派大臣來川訊辦各等語曾望顏身爲大員既被屬員反噬斷難再令與聞此事況翁祖烈所計各條是否屬實亦應確切查明方足以折服其心崇實此時將次行抵四川著將此案提集人證秉公嚴訊徹底查辦以成信讞至隨同審案之員該大臣可於成都駐防旗員及省外文員內選派數人其在省人員及陝西人員概無庸派委以防該參員有所藉口曾望顏原參翁祖

烈撤任摺片並此次請派大臣摺及鈔錄稟詞計款二件均著鈔給閱看將此由六百里諭令知之○署四川總督曾望顏奏知府被參後懷忿訐告多款請派大臣來川查辦得旨汝雖非負氣強辯亦迹近剖白身爲大吏一被屬員反噬卽請撤任是窺朕平日有不信大吏之心朕實深愧也○以克復廣西柳州府及柳城縣城賞道員劉坤一按察使銜並各升敘給封有差○予陣亡從九品許繼武等祭葬世職○癸丑諭內閣上年冬令雪澤稀少降旨派山東布政使清盛恭齋大藏香虔詣 泰山代朕叩禱茲自二月初七日起祥雲疊沛渥澤深霑農田可卜豐登朕心實深寅感著仍差內務府司官一員齋大藏香十隻馳驛前往山東省城交巡撫文煜傳旨令布政使清盛恭詣 泰山虔申報謝以答 神庥○惠親王綿愉等奏謹將庫存 仁宗睿皇帝聖訓黃綾本式

樣尺寸及議改五摺榜紙每十二頁用紙一張式樣尺寸各繪樣  
黏呈請旨遵行抑或仍遵舊制辦理可否 欽派大臣據實查驗  
得旨著派端華穆薩查驗其奏前旨甚明猶至再至三屢請變通  
想該司員匠役等無利不辦此係何事尙敢如此取巧並欲擅更  
舊制將來展閱不便皆朕之刻意求省之故尤屬非是此批摺與  
御前大臣軍機大臣同看○賞江甯布政使薛煥巡撫銜幫辦五  
口通商事宜○甲寅諭內閣張芾奏官軍勦賊失利涇縣旌德被  
陷見在力籌堵禦並自請嚴議一摺逆匪竄踞涇縣之黃柏嶺灣  
灘等處經官軍屢次擊退獲勝正月十九二十五等日賊分大股  
來撲副將楊名聲知府陳炳元等奮勇廝戰斬獲甚多並殺斃賊  
首賴汝禾一名詎賊愈聚愈眾涇縣旌德遂於二十六日相繼失  
陷著張芾督飭員弁兵勇進剿迅圖克復城池並嚴防徽郡一帶

飛調江長貴帶隊援剿務期殲除醜類毋留餘孽所有失事文武員弁著一併查明分別參辦張芾著交部議處○諭庚長奏逆捻關入清江浦自請從重治罪一摺據稱大股逆匪由順清河直撲清江浦經該河督帶兵迎剿疊獲勝仗詎該逆分股從後鈔截我軍失利致被閹入見在退保淮城俟調集援兵再行進剿該河督辦理防剿有年此次失事雖因賊眾兵單究屬堵剿不力咎有應得庚長著卽革職暫畱本任仍著督率將弁迅圖克復以贖前愆○諭軍機大臣等張芾奏克復建德縣城並涇縣旌德失陷周天受奏甯郡情形喫緊飛調援師各等語逆匪由銅陵繁昌攻陷涇縣進踞清弋江蔓延至楊柳埠去甯國府城極近周天受見已由竹塘統兵回郡著卽督飭將士實力堵剿毋任再有滋蔓甯國縣爲入浙門戶地關緊要南陵遠隔嶺外亦應速籌援應並著周天

受威防派往甯邑之遊擊楊得春等飛速前進力籌堵禦毋許稍有疏失南陵防軍應如何設法往援卽會商張芾妥爲辦理至涇縣匪原復分股攻陷旌德該縣距徽州府城僅百餘里據張芾奏稱城內並無存兵雖已調江長資由黟縣太平赴旌德截勦深恐路徑紛歧難於兼顧致被闖入並著周天受速派得力將弁管帶精銳由甯邑繞赴績溪迎頭截擊毋任賊蹤得以擾及郡城至建德甫經克復自應派兵駐守江西各軍內如道員劉于淳吳坤修等何員可以派令帶兵駐紮卽著張芾一面派撥一面知照惲光宸辦理以期迅速而免貽誤張芾另片奏請將招撫韋志俊等出力各員鼓勵等語韋志俊旣已調赴東流所有出力義勇著卽會同楊載福酌量保奏其接濟韋志俊一軍之知府張慶安等旣能相機應變尙屬著有微勞卽著張芾酌保候朕施恩將此由六百

里各諭令知之○諭本日據聯英庚長奏清江失陷及見在布置情形各一摺清江爲南北咽喉豈容任賊久踞致令各省文報不通淮安存城兵勇無多旣難分撥赴援庚長所調畱防衛陽蔣壩之總兵鶴齡安勇等軍著卽飛催迅速前進實力堵禦其田在田等督帶之馬步隊並袁甲三先後調派之營總克蒙額已革遊擊楊國正等所帶之馬步隊計已陸續可到前飭和春等所派之揚防官軍相距較近著聯英庚長一面飛速催提一面督令已到各軍會同鶴齡等軍將匪眾擊退以保淮城至清江無城郭可守恐該匪搶掠後卽行紛竄聯英等務當設法堵截勿令竄往東南擾及裏下河各邑以保完善之區是爲至要將此由六百里諭令知之○浙江巡撫羅遵殿奏勦捕餘姚土匪審明正法餘匪遁入大關山見帶嚮導搜捕得旨大關山路徑叢雜自應以鄉民爲嚮導

極力搜捕若置之不顧將來必致蔓延又奏查明欠解錢糧奉化  
縣知縣吳芳蕙定海廳同知陳繩武一併撤任批既已撤任卽應  
奏參若必待查出弊端方參恐啟劣員玩愒之漸並難保接委各  
員不代爲彌縫著補摺參奏以儆效尤○乙卯諭內閣前據裕瑞  
奏葉爾羌庫庫雅爾桑珠二莊向設銅廠請將銅斤折交錢文當  
經降旨令扎拉芬泰委員查明有無流弊茲據奏稱揀派伊犁領  
隊大臣錫拉那前往查明咸豐五六年間因籌辦開礦是以將庫  
庫雅爾桑珠二莊每年應交糧布棉花及一切雜差概予豁免近  
年銅斤短絀情願折交錢文雖經該伯克等僉稱毫無抑勒惟令  
該回眾因此賠累非所以示體恤可否免其折交銅斤仍復糧賦  
舊制請旨遵行等語該處開設銅廠原以供鼓鑄之用今既產銅  
短絀未便令折交錢文情同科斂所有庫庫雅爾桑珠二莊折交

銅斤錢文卽著停止仍收原額糧賦以復舊章而杜流弊○諭軍  
機大臣等前據裕瑞英蘊奏浩罕額爾沁阿布都剴里木違旨逗  
留肆意行兇經弁兵將其格斃當經諭令扎拉芬泰委員前往葉  
爾羌將起釁本末查明具奏茲據該將軍等奏接到裕瑞等函致  
此案原委已派員由冰嶺馳往查辦正與朕意相合本日復據裕  
瑞等奏查明浩罕額爾沁實係謀逆未成審明定擬並譯出寄回  
浩罕逆信呈覽各等語該額爾沁本爲輸誠效順而來何以一朝  
逞兇毫無忌憚且此次裕瑞等摺內所稱額爾沁寄信與浩罕伯  
克並屬呼岱達約會各莊安集延謀逆各情前次摺內並未提及  
難保非因事變已成添飾情節見據扎拉芬泰揀派佐領圖們額  
著扎拉芬泰將裕瑞等摺件詳細閱看所擬罪名有無未協之處  
前赴該城查詢原委而此案業已由裕瑞等擬結恐有不實不盡

並著另擬具奏至額爾沁罪由自取戮非我開雖據裕瑞等令阿奇木伯克能否折服不至別生事端尙未可定其應如何防範及一切善後事宜並著該將軍會商裕瑞英蘊悉心妥辦毋稍大意裕瑞等原摺並譯出逆信均著鈔給閱看將此諭令知之○丁巳諭內閣班禪額爾德尼呼畢勒罕於本年十月初二日坐牀著派恩慶會同色喀本諾們罕前往看視所有頒給敕書賞齋等件著理藩院揀派司員二人馳驛齊往其沿途經過直隸山西陝西四川等處地方著各該督撫派委道府副參大員妥爲護送並著曾望顏於司庫提銀一萬兩俟該員到省時交給帶往一併賞給班禪額爾德尼至打箭鑑以西著該督知會前途照例豫備馬匹勿致遲誤○己未 上還宮○諭軍機大臣等聯英庚長奏迎擊竄突淮安捻匪並籌議防勦清江踞匪一摺覽奏殊爲憤懣清江爲

南北咽喉地當衝要必須趕早克復方不至蔓延腹地何以大股  
捻逆尙踞清江賊勢仍形猖獗該署漕督等不過株守待援一籌  
莫展本日據和春奏已令李若珠帶兵赴援袁甲三傅振邦早經  
具奏派往各軍爲數已屬不少此時諒已先後到浦聯英等卽一  
面催提各軍一面督飭鶴齡安勇等南北兩路夾攻卽因賊勢眾  
多未能盡行殲戮亦當驅之歸巢不使紛竄擾及裏下河一帶完  
善之區是爲至要儻令該捻日久盤踞清江使南北道途梗阻甚  
至竄往東南朕惟聯英庚長是問決不寬貸將此由六百里諭令  
知之○署湖南提督周天受奏報甯國廣德等處喫緊見在抽派  
勁旅會合浙軍節節進剿得旨續派之林保黃金友等相機前進  
總不可著落後浙防兵勇未可深恃著趕緊截擊勿令擾及完  
善之區○以春佑爲熱河都統倭什琿布爲理藩院尙書

由甯夏將軍遷

○庚申諭內閣禮部題請派繙譯會試提調官一本所有開列據選司員二員著照文會試之例由該堂官帶領引見候旨揀派並著該部纂入則例永遠遵行○辛酉諭內閣戶部奏請將燒鍋稅銀赴部交納等語直隸省燒鍋稅銀前經戶部奏明令該商在戶部呈交迄今日久仍有在該州縣交納已領印收而稅銀並未解部者並有商戶等在部完交該州縣仍復縱差需索飭經該部據商戶控告咨交直隸總督等衙門親提訊究延不咨覆實屬不成事體著直隸總督順天府府尹迅將此等侵匿稅課擾累商賈各員確切查明嚴行參辦並著轉飭直隸藩司通飭各屬將燒鍋商戶清冊限一月內先行造報並令每年六箇月造報一次儻再遲延卽將該藩司參處嗣後此項稅課不准在各州縣交納悉令赴戶部兌收其地方稍遠者彙齊赴部代交如該州再有私收商稅

侵匿需索等弊卽著該部從嚴參辦以重稅課而安商賈○諭前  
因署四川總督成都將軍有鳳奏請將滿洲營閒散餘兵調充省  
標新兵當交該部詳查飭駁從重議處茲據兵部等衙門奏稱滿  
洲營挑補綠營兵額向有定額不得過十分之二該署督輕議更  
張殊屬有違定制所請滿洲營餘兵調充省標新兵之處著不准  
行前署四川總督成都將軍有鳳著卽照部議革任○諭軍機大  
臣等張芾奏賊匪蠻陷太平等縣請催江西協餉並請飭江西兵  
勇駐守建德祁門各等語本日已諭知憚光宸飭令普承堯統率  
所部及把總李濟元團勇駐守建德吳坤修一軍移駐祁門以資  
扼勦其江西協餉前經憚光宸奏明每月協撥銀三萬兩亦已諭  
知該撫速行籌撥源源解往矣張芾在徽辦防有年一旦賊至卽  
致數縣城池悉行失陷未知平日所辦何事此時賊勢鴟張自應

亟籌保守徽州府城以免匪蹤再有滋蔓江長貴業已抵郡卽著  
張芾會商該署總兵督飭將士實力堵勦俾賊眾不敢輕視郡城  
仍將已失各縣城池速圖克復以贖前愆前因涇縣旌德失守曾  
諭周天受撥兵赴徽援剿本日據周天受奏稱廣德州又復失守  
見在分軍扼堵入浙之路自顧不暇未必能兼顧徽郡涇縣爲徽  
甯兩郡往來要道張芾總應設法攻復以通聲息而資聯絡將此  
由六百里諭令知之○諭前據和春奏甯國淮安兩處軍情同時  
喚緊於挑兵三千名赴援清淮之外撥於金陵南北各營抽撥精  
銳二千名前往高淳聽候鄭魁士調遣本日據瑞昌等奏稱皖南  
賊阻竄附涇縣旌德甯國太平績溪等縣廣德州探聞亦已失守  
浙江省杭湖兩屬之昌化孝豐等縣壞地均與毗連賊氛漸逼請飭  
和春迅撥勁兵數千兼程前進以期保全浙江門戶各等語清江

賊匪見因北岸援兵雲集有由黃河南岸竄回老巢之信是淮安軍情亦已解嚴而浙省賊勢正當喫緊不可不先其所急該大臣先將派赴高淳之軍飭令迅速赴援保全兩浙門戶查明清淮賊情稍鬆卽將前派赴援之軍改赴高淳並由大營酌量抽調勁旅以資策應毋稍延緩至此次賊勢歸併徽甯蕪湖巢穴空虛並著該大臣等速飭總兵吳全美李德麟等迅督艇師緊攻蕪湖以期竄擾廣德等處之賊聞警回援藉資牽制將此由六百里諭令知之○諭本日據瑞昌等奏徽甯賊勢漸逼浙境見籌撥兵防堵並請酌調乍浦滿兵赴省協防一摺皖南賊匪屢次竄陷涇縣旌德寧國太平績溪等縣廣德州探聞又已失守浙省杭湖兩屬之昌化孝豐等縣壤地在在毗連亟應力籌扼堵以防竄突瑞昌等業經派協領賽沙畚帶存城兵二百餘名會同段光清與協防局練

勇五百名截留江南新募勇一千名一併統帶卽日馳抵餘杭李豐一帶擇要布置並據羅遵殿奏稱已由總兵李定太派令遊擊胡應元帶勇千名前赴於潛昌化駐紮該鎮自督兵勇二千探賊所向迎頭截擊其千秋閘等處並派同知程鍾英等招集練勇以資守禦等語所籌均尙周妥李定太前在浙江總統軍務甚爲得力著卽專派該鎮調度諸軍併力截剿毋令該匪闖入浙疆擾及完善之區所稱酌調乍浦滿洲營兵四百餘員名赴省調遣之處卽照所請行至請飭和春等撥兵援應一節前據和春奏稱於金陵南北各營抽撥精銳二千前往高淳聽候鄭魁士調遣本日業由六百里寄諭和春張國樑李若珠令其酌量派撥勁旅迅速赴援俟此兵一到卽令會合李定太周天受等前後夾擊迅埽賊氛毋致滋蔓將此由六百里諭令知之○諭張芾奏軍情緊急請催

協餉並請飭江西兵勇駐守建德祁門各等語賊匪竄陷涇縣旌  
德後太平甯國績溪等邑相繼不守江長貴業已統兵回駐徽州  
郡城藉資扼効而祁門黟縣防兵既經抽調一空深恐池州賊眾  
復圖內竄非獨皖事益不可支卽江西邊境亦深虞竄突總兵普  
承堯等自克復建德以後聲威稍壯著惲光宸卽飭普承堯統率  
所部及把總李濟元團勇駐守建德道員吳坤修一軍移駐祁門  
確探賊蹤嚴密堵勦毋任匪眾竄擾徽郡兼顧江西門戶其浮梁  
樂平等縣凡與皖境毗連處所應如何派撥官兵以資防守並爲  
普承堯等後路聲援之處並著惲光宸妥爲籌辦毋任疏失至徵  
甯餉需前經惲光宸奏稱每月由江西解銀三萬兩見在皖事喫  
緊且廣德州亦已失守浙省邊防危急恐難兼顧徽餉所有江省  
應解餉銀卽著惲光宸迅速籌撥源源接濟毋稍延誤將此由六

百里諭令知之○諭本日據周天受奏賊匪竄陷廣德州城並派  
兵搶扼各要隘情形一摺已降旨將周天受交部議處矣逆蹤飄  
忽躡常意在直趨江浙以解金陵之圍見在太平甯國績溪等縣  
與廣德州城相繼失陷湖州蘇常各郡防務均形喫重四安鎮六  
洞橋兩要隘雖經參將周天孚副將黃金友等帶兵馳往力遏兩  
路正衝並由該署提督添派參將王興棠等督兵續往助防惟該  
處道路紛歧兵力尙嫌單薄已諭令和春由江南大營酌撥精兵  
馳赴援應並據羅道殷奏已飭李定太迅移衝防兵勇馳往湖郡  
交界地方相機迎截該署提督惟當先就見有兵力督飭在防將  
士嚴密布置毋令賊蹤繞越江浙境內至涇縣爲徽甯兩郡往來  
要路亦宜設法疏通庶文報不至梗阻另片奏稱賊蹤飄忽恐其  
注意浙省擬親督勁旅入浙期辦等語見在浙省已有李定太一

軍迎頭截擊兵力足資堵禦甯國郡城爲皖浙緊要關鍵該署提督亦未可輕離重地惟當駐守郡城相機調度庶彼此可期兼顧將此由六百里諭令知之○以廣德州城被賊竄陷督辦甯國軍務提督周天受下部議處○王戌諭軍機大臣等曾望顏奏請飭黔省辦理善後等語四川酉秀邊界賊黨股數甚多經曾望顏勦撫兼施彭浩官軍已將首逆王帶周擒獲見在專剿濯水一股計日當可蕩平惟王帶周前踞各寨均係黔省印江婺川正安三縣所屬地方州省官員止能越境進剿至撫綏地方安插難民一切善後事宜必須黔省地方官妥爲經理方不至再滋事端重煩兵力著海瑛卽飭印江等縣地方官將被難居民認貞綏輯務使閻圖各安生業儻該地方官不能得力卽行奏參另派賢能之員前往辦理將此由六百里諭令知之○諭本日翁同書奏軍餉萬分

窘乏請飭催協撥等語翁同書軍餉僅恃山西陝西河南每月各  
協撥銀二萬兩見在南北江皖兩路軍威頗振翁同書一軍亦攻  
克鏽橋進圍定遠漸有起色各營兵勇餉糈匱乏枵腹堪虞該省  
地方與捻交乘久經糜爛既無可籌之款若各省協撥銀兩再有  
遷延短欠必致饑軍譁潰貽誤不淺著英桂譚廷襄瑛棨按照每  
月撥銀二萬兩如期籌解毋得推延將此由五百里各諭令知之  
○癸亥春分朝 日於東郊○甲子諭內閣前因戶部官票所官  
吏更交通舞弊當經降旨令載垣會同刑部審訊並將各官吏家產  
派王大臣查封茲據載垣等奏已革官票所掌關防員外郎景雲  
等先後聽受筆帖式常祿書吏董桂庭等賄屬用短號鈔換出長  
號鈔得受謝錢常祿等又聽從已故員外郎色卿額自咸豐八年  
秋間至九年春間向換鈔商民勒索使費與書吏俞俊等分用該

官吏等交通婪贓舞弊殊屬膽玩所有已革員外郎景雲崇貴筆帖式常祿鳳儀郎中宗室奕遷主事豐瑞書吏俞俊歸瓊董桂庭各家產著原派王大臣前往先行查鈔入官俟結案時再行定擬罪名色卿額起意勒索商民使費雖已病故其家產貨財著派愛仁一併查鈔入官至短號整票兌換長號零鈔據忠麟王熙震等供稱曾經回堂議准惟日久未能記憶所回何堂著七八兩年戶部歷任各堂官據實明白回奏不准稍涉推諉○是月展緩直隸開州等三州縣被淹村莊本年額賦蠲緩河南舞陽等十四縣被援地方新舊額賦

三月乙丑朔諭內閣滿慶等奏班禪額爾德尼坐牀受戒請派照料一摺班禪額爾德尼呼畢勒罕見屆坐牀又值受戒之期達賴喇嘛尙屬年幼未能前往前班禪額爾德尼披剃更取法名時經

呼徵阿齊圖呼圖克圖前往辦理甚屬吉祥仍著派令前赴扎什  
倫布照料坐牀受戒以示朕振興黃敎至意○諭軍機大臣等前  
因瑞昌等奏採聞廣德州城失守請飭江南迅撥勁兵業經諭令  
和春等將上次派赴高瀋之兵飭令迅速赴援以固浙江門戶茲  
據羅遵殿奏賊氣直逼浙境安吉城內已有賊蹤毗連廣德之東  
平湖築有賊卡二座李定太甫抵梅溪爲大股賊匪所乘帶傷折  
回湖州周天孚在西安鏖戰亦恐寡不敵眾杭湖情形危迫請飭  
於江南大營撥兵派鄭魁士督帶援剿等語又據周天受奏所派  
援兵於泗安迎剿獲勝是羅遵殿所奏不免稍涉張皇惟浙江無  
素能用兵之將所恃李定太督率調度不料甫經出仗卽已受傷  
退至湖州本日又據和春奏安吉亦已失守鄭魁士帶兵四千取  
道溧陽等處救援又恐鄭魁士一軍僅能進攻廣德未能繞出賊

前又派副將曾秉忠參將羅希賢帶陸兵二千名水勇一千名戰  
船六十號由蘇常馳往湖州堵勦何桂清等復派兵一千一百名  
長龍船一百隻前往助勦兵力不爲單薄但能調度得宜無難蕩  
端賊蹤其高漕東塘爲蘇常門戶因鄭魁士帶兵出援另派朱承  
先梁成桂帶兵四千餘名分別屯紮以固守要隘所籌甚爲周密  
本日周天受指內有南陵灣黃如一撤防賊必羣起而進聯廣德  
爲一氣之語和春等諒必加意防範不使該逆有隙可乘庶於救  
援鄰省之中爲自固藩籬之計將此由六百里各諭令知之○諭  
羅遵殿二月初十四日兩次奏報均於本日先後遞到所陳杭  
湖危急情形並請調援兵各等語逆匪竄陷廣德窺伺杭湖並已  
闖入安吉情形實屬喫重所請飭令和春派兵援應之處見據該  
大臣奏稱已令鄭魁士統兵赴浙並派副將曾秉忠等統帶水陸

官兵三千名由蘇常徑赴湖州合之何桂清所派三起官兵及長  
龍船板船水勇爲數已屬不少並據周天受奏已派周天孚帶兵  
於四安獲勝著羅遵殿卽將前調援兵飛提前進速將安吉攻復  
賊眾尙未深入自不難於擊退李定太素善用兵此次尙未槩定  
營盤猝然遇賊以致受傷退守湖州俟江南兵到仍令會同出勦  
不可令其株守一隅省垣防堵固屬緊要亦不可以有用之兵徒  
爲防守之計總須迎賊截勦使無深入庶足以保全完善之區該  
撫當統籌緩急不可徒事張皇其濱黃南陵防兵據周天受奏稱  
曾經該撫飭令由建平轉入四安惟濱沚爲江浙藩籬一經撤動  
則蘇湖青繁賊眾必與廣德聯爲一氣大局更不可問等語所奏  
不爲無見所有濱黃南陵等防兵羅遵殿切不可輕率調動致有

疏虞其甯軍餉需並著該撫揀派妥員由湖州取道梅溪建平陸

續解往毋得藉詞延誤張苦如能提兵援浙固屬就近但恐自顧不暇已諭令酌量緩急抽撥協濟所有徽甯二處援軍俟抵粵境統歸李定太調度已諭知張苦等飭令帶兵將弁遵照辦理矣曾國藩遠在皖北未能赴浙卽江西兵亦恐緩不濟急另片奏請截畱漕米以濟眉急等語所有未經起運漕糧准其截畱數萬石接濟軍民食用先將截畱數目具奏至多不得過五萬石一俟軍務稍鬆卽行籌補起解將此由六百里諭令知之○諭周天受奏四安官軍閩剿獲勝並灘陳南陵等處防軍未可輕撤一摺逆匪由廣德州竄撲四安經參將周天孚等督率隊伍分路截殺追奔二十餘里得此勝仗賊鋒自可稍挫惟本日據羅遵殿馳奏李定太禁營未定被匪攻撲突圍退守湖郡又據和春等奏探聞賊已竄陷安吉縣城此時匪眾已繞出四安之南逼近杭郡省城待援孔

急若卽飛催周天孚帶兵繞出賊前迎頭截擊見據和春奏已派  
鄭魁士統兵四千由溧陽一帶馳援湖郡復派副將曾秉忠等統  
帶水陸官軍三千由蘇郡馳赴浙省江蘇督撫又撥兵協濟當足  
以資助辦鄭魁士赴浙後高淳東壩和春已派兵扼守至南陵黃  
池灣沚亦爲江浙門戶況見在甯邑已失甯郡可危該署提督不  
可因羅遵殿咨調遠將防兵撤歸浙境又據羅遵殿奏張芾咨稱  
擬俟克復績溪後親督勁旅赴援浙江惟徽郡情形亦屬急迫能  
否分兵出勦著張芾酌量情形權其緩急抽撥應援如有得力將  
弁可以管帶張芾亦不必親自赴浙至徽甯二處赴浙援兵俟入  
浙境後統歸李定太調度所有甯國軍餉已諭羅遵殿派委妥員  
繞道起程不得藉口延誤將此由六百里各諭令知之○諭本日  
據袁甲三奏克復清江截勦定遠竄匪獲勝並馬隊不敷分撥各

招片定遠逆匪先聞清江克復之信欲由東路渡淮會合北捻竄過戴家港一帶經袁甲三營次派兵截勦獲勝始由馬壩一路遁去是否欲投三河據稱尙未探確等語見在清江克復定遠賊勢已孤袁甲三正當乘此銳氣會合翁同書一軍緊攻定遠迅速克復次及廬州舒桐期與楚軍聯絡一氣肅清皖境至袁甲三軍營馬隊甚少見在馳援清江不無疲乏自係實在情形所有山東撥去馬隊准其暫緩調赴勝保軍營惟皖豫境地毗連見在豫省兵力較單翁同書營中馬隊既分往六安潁上恐難敷抽撥著袁甲三隨時偵探如豫省有兵力不敷之處卽行酌量分兵協助毋分畛域之見將此由六百里諭令知之○袁甲三奏克復清江並截期定遠竄匪獲勝請復已革遊擊楊國正職得旨朕記楊國正係胡興仁奏畱未准經勝保奏請畱營暫停發遣是該革員並未免

罪驟予開復未免過優又奏逆首龔長春疊請納款獻城參領恒  
德都司李紹銘赴天長縣城受降未知下落批雖係該員等易事  
輕進汝爲統帥亦難辭疏於豫防之咎○丙寅諭內閣前因軍務  
未竣推廣捐例節經戶部等衙門議准親屬同官一省捐免回避  
茲據吏部奏稱行之日久流弊滋多著照所議卽行停止其從前  
已經捐免各員著各督撫府尹勒限三箇月飭令詳細呈明如係  
捐省之員准其另指一省各案原班序補儻係軍務省分不得另  
指無軍務省分以杜取巧業經得缺各員咨部以總督兼轄省分  
改掣如無總督兼轄及兼轄省分或係本籍祖籍卽改掣鄰近省  
分均歸不入班次遇缺卽補未補缺各員准其呈明戶部將回避  
銀兩改爲加級紀錄儻逾限不報卽照隱匿例私罪議處不准抵  
銷以復舊制而肅官方○戊辰諭軍機大臣等前因特普欽等奏

將鄂倫春牲丁收羅團聚分布要隘當諭令將如何酌給口糧之處妥議章程具奏茲據該署將軍等奏稱酌擬章程繪圖呈覽所有庫瑪爾畢喇爾托阿哩多普庫爾五路鄂倫春著卽照所議地方令其環居遊獵以備緩急調用阿里多普庫爾托三路鄂倫春旣移於內興安嶺以內其嶺外呼倫貝爾卡倫之東謨哩勒克一帶地方遼闊著卽責成該處附近遊牧之新舊巴爾虎人等一體防範並准其於額爾固訥河以下布魯河謨里勒克河兩處各添設卡倫一處並在查邊要路額勒霍訥河根河渡口等處各添設卡倫一處加添官兵坐守與呼倫貝爾珠爾特依卡倫會哨巡查以期周密該鄂倫春所食口糧應行接濟及挑備官員領催管束之處均著照特普欽等所擬辦理鄂倫春五路勇丁經此次指定地方設法接濟並每路挑備官員領催等管束卽不得令其任意

遠離務須隨時稽查毋令越限游獵是爲至要將此由四百里諭令知之○諭軍機大臣等本日據瑞昌等奏逆匪直撲省垣危急情形一摺皖南之賊由廣德進竄四安逼近浙境業經和春等派兵赴援乃該逆竟由武康直撲浙江省羅遵殿等登陴守禦事前既布置倉皇徒爲守城之計並未派兵迎擊實屬無能之至覽奏殊深憤懣據稱和春等續派副將向奎帶兵二千總兵張玉良帶兵二千周天孚亦管帶兵勇二千三百餘名進援浙江省合之前派鄭魁士曾秉忠所部六千名兵力亦不爲不厚何以任令該逆逼近浙省恐各軍未能確探賊蹤以致節節落後著和春張國樑何桂清迅速催令前進以解省城之圍瑞昌等見在固守待援務卽激勵兵勇妥爲防範米興朝統兵三千六百名已抵江口即可迎提協剿一俟江南援兵雲集卽應內外夾擊痛殲醜類毋得株守省

垣致成坐困之勢本日已諭令慶端等調兵二千名由閩赴援並  
諭周天受跟蹤追剿攻賊之背矣瑞昌等另片奏請飭乍浦副都  
統錫齡阿再派官兵四千名來省助剿等語此項官兵連前調之  
兵共八百名卽著瑞昌飛飭錫齡阿管帶赴省以資防勦協領祥  
瑞帶兵前抵塘棲旣知省城危急竟敢折回嘉興寶屬畏憚著先  
行摘去頂帶仍令帶兵赴省隨同剿賊如再不知奮勉卽著從嚴  
參辦將此由六百里加緊諭令知之○諭周天受奏西安又挫南  
陵獲勝一摺西安爲入湖州正衝該逆以全力拑死圍撲我軍力  
竭無援以致西安五營被賊攻陷殊堪憤懣本日據瑞昌羅遵殿  
等奏賊由武康徑撲省城見在嬰城固守情形萬分危急周天受  
惟當激勵將士奮勇直前由孝豐一路攻賊之背以解杭城之圍  
所陳甯餉缺乏請就近接濟餉需一節已諭惲光宸迅速撥解矣

將此由六百里加緊諭令知之○諭本日據瑞昌羅遵殿等奏賊由武康徑撲省垣存城兵勇無多見在嬰城固守情形萬分危急等語賊匪竄入浙境前調江南大營兵數千名尙未能全數到浙此時猝撲省垣非厚集兵力不足以資攻剿著慶端瑞璽迅速撥兵二千名派得力將領管帶探明就近道路馳赴浙江救援以解城圍毋許遲誤將此由六百里加緊各諭令知之○諭周天受奏甯國一軍欠餉過多請籌接濟一摺四安爲入浙門戶扼守官兵因力盡無援又復挫敗賊已由武康徑撲省城情形萬分危急已飭周天受整頓各軍力圖前進以解杭城之圍惟甯國一軍欠餉過多軍心已不甚固勢難驅策飢軍前進著惲光宸無論何款迅速籌撥銀數萬兩趕解甯國軍營以濟眉急毋許遲誤致干重咎將此由六百里加緊諭令知之○浙江巡撫羅遵殿奏賊撲省垣

情形得旨羅遵殿身任疆圻乃事前既布置倉皇徒爲守城之計  
迨賊蹤不遠尙不知派兵迎擊實屬無能之至○命編修袁保恆  
發往安徽軍營交袁甲三差委○庚午諭軍機大臣等和春等奏  
派兵援浙並江浦獲勝何桂清等奏逆匪撲杭州省城請續派督  
辦大臣各一摺逆匪逼近杭州市城情形萬分危急和春等先後  
派援各軍已一萬有餘計可陸續趕到前有旨令李定太調度援  
浙各軍見在該總兵在梅溪受傷折回湖州威望已失難資統率  
所有浙江軍務卽著和春兼辦並著候補提督張玉良總統援浙  
諸軍其各省派出帶兵之員及浙江各軍均歸張玉良調度以一  
事權昨諭慶端等由福建迅派援兵二千取道前往浙江省本日復  
諭令惲光宸飭令饒廷選帶兵赴援此項官兵到浙後一併歸張  
玉良調遣羅遵殿止知固守省城並未派兵迎擊已非上策見將

援救湖州各軍全數調赴杭州不知杭州之賊僅止一股大股尙在長興等處似此未識賊情必致墮其奸術朕深爲繫念著和春等卽飭張玉良督催諸軍迅解城圍毋得遷延遲誤一面兼顧湖州保障蘇常毋得顧此失彼將此由六百里諭令知之○諭何桂清徐有壬奏湖州軍情緊急並賊撲杭城請飭大臣督帶各一摺昨據瑞昌等奏逆匪由武康一路直逼杭州市城已諭令和春等迅催援浙各軍以解城圍並諭令慶端等調福建兵二千名馳往救援見在徽甯江浙各軍爲數不少李定太梅溪一挫威望已失自應簡派大員以資統率本日已諭令和春兼辦浙江軍務所有援浙諸軍均歸候補提督張玉良總統俾事權歸一不至調度失宜逆賊兩次攻撲湖州均經我軍擊退自可無虞惟杭湖偏近江蘇浙省一經得手恐該逆另圖竄擾該督等見在籌防江蘇布置

尙賜安協著卽認真堵截毋令闖入江境另片奏請飭江西接濟  
餉銀等語已諭憚光宸每月解徽州餉銀八萬兩矣該督等既知  
保全大局救浙救甯同一喫緊見雖解江西軍餉已在月解數內  
不能補浙餉之缺自應由蘇省協甯以免瓦解俟將來軍務稍鬆  
仍可停解其援浙諸軍餉需經該督等已由江蘇墊發尤應隨時  
接濟毋稍延誤將此由六百里諭令知之○諭本日據羅遵殿奏  
軍情愈緊請飭鄰省協濟軍餉等語浙江被圍旣患兵單益虞餉  
絀指日援兵雲集各路民團募勇所費數倍於前見當防兵喫緊  
之時豈容以餉乏兵飢致形決裂著慶端瑞璕無論何款撥銀十  
萬兩迅速委員探明道路管解赴浙以濟眉急江西見當無事之  
時惟已撥應徽甯軍餉能否籌撥數萬兩接濟浙江省亦當酌度情  
形不分畛域寬爲籌備方爲妥善本日復據張芾奏請飭解徽餉

並飭總兵饒廷選拔浙等語徽防軍餉積欠過多將虞譁潰著惲光宸飭令藩司毓科仍遵前旨按月籌解徽餉八萬兩如數速籌接濟並飛飭見駐浮梁之總兵饒廷選率所部兵勇星速赴援浙江以資攻剿毋許遷延將此由六百里各諭令知之○諭本日據羅遵殿奏軍情愈緊請飭鄰省協濟軍餉並請將知縣暫行革畱等語皖南逆匪擾入浙境直撲省垣該撫將援湖水陸各軍全數調赴杭城不識逆匪分我兵力墮其術中已屬調度乖方而且主守不主戰守近不守遠株守省垣致成坐困之勢實屬無能之至見在已命和春兼辦浙江軍務並命張玉良總統援浙諸軍所有江淮徽甯官軍悉聽調度羅遵殿卽飭令聽候張玉良調遣毋庸歸李定太總統該撫亦不得率行更調致失機宜此時惟當激勵將士固守省城一俟援師雲集內外夾擊以解城圍安吉縣知縣

陳鍾英於縣城失陷後尙能督同士民於一二日間將縣城克復尙知奮勉著革職暫行畱任所請飭令福建江西籌款接濟已諭慶端等籌銀十萬兩並諭惲光宸酌量籌撥矣見在援兵齊集所有江南援浙各軍已由何桂清等墊給軍餉該撫亦當督率司道各員悉心籌畫俾得源源接濟不得以無著一語爲將來冒銷地步將此由六百里諭令知之○諭張芾奏派兵援浙仍親赴徽郡以顧門戶一摺皖南逆匪攻陷武康直撲浙江省城存城兵勇無多見在嬰城固守情形萬分危急張芾所派總兵米興朝帶兵四千名據羅遵殿奏已行抵江口其所派參將袁國祥一軍由水路進發並著張芾飛催前進與江南諸軍會合夾擊以解杭城之圍見命張玉良總統援浙諸軍各路均歸調度大兵雲集無難立殄賊氛張芾自應仍駐徽州以固浙江藩籬毋庸親往將此由六百

里諭令知之○何桂清奏英佛各酋呈遞照會並呈大學士公文  
有欲令中華認咎派員赴津迎接及長駐京城賠償兵費各節大  
致相同譯出該國新聞紙有英佛增兵共有三萬之眾攜帶礮械  
等具仍攻天津並有於北塘左右得水勢深處登岸直鈔津口礮  
臺之後等語奏入命軍機大臣照會何桂清轉覆該國並諭僧格  
林沁恆福相度形勢妥爲布置○壬申予湖南陣亡縣丞鄭其光  
等江南陣亡副將高玉振等祭葬世職○甲戌諭軍機大臣等勝  
保奏行抵豫省查知兵力單薄歸德等屬業經設立堡寨辦理團  
練擬就見辦章程再加整頓並於各鄉團內酌抽壯丁勤加訓練  
聽候徵調統俟慶廉到後籌商妥辦等語已諭令該副都統照議  
辦理矣抽丁訓練事屬冊始必須派委能員分投督辦以免有名  
無實口糧等項須各州縣就地籌捐藉資接濟儻有不肖莠民藉

端滋事亦須地方官妥爲彈壓消患未萌均著慶廉會商妥辦至  
勝保慮事權不屬呼應不靈嗣後除地方尋常事件勝保不得與  
聞外其閑涉軍務事宜應催應參均著勝保與慶廉會辦以重事  
權至軍營餉需並著該撫督飭藩司源源接濟毋使支絀將此由  
六百里諭令知之○諭本日據勝保奏行抵豫省籌辦情形並請  
添調營員馬隊各摺片業經降旨將武員佟煊等三員准其發往  
差遣矣豫省境內見已一律肅清而江皖豫三省交界皆係賊圩  
難免時出竄伺勝保以關保一軍數千名尙嫌單薄不能不藉助  
民團見擬遴員分赴歸陳各屬照瑛稟前辦章程按團抽丁勤加  
訓練並於完善各府縣籌捐糧米計口授食所籌自係爲整頓防  
務起見著照所議會同新任巡撫慶廉妥爲辦理總期著有成效  
足資敵愾均不可有名無實至團勇能否調赴軍營著體察輿情

酌量辦理捻逆見在脣脳邳宿此路防勦正當喫緊豈能有得力  
勁兵分撥赴豫所請飭調馬隊千名之處若毋庸議勝保見於豫  
省各標挑選精兵並另募北勇訓練惟當就見有兵力會合關保  
等軍由亳州一帶直擣賊巢亟圖堵蕩俟皖省軍務稍鬆則傅振  
邦袁甲三兩軍內馬隊尙可通融分撥毋許瀆請將此由六百里  
諭令知之○丙子諭內閣前據瑞昌羅遵殿等馳奏皖南逆匪由  
廣德進竄四安並從武昌縣直撲杭州省城當諭令和春兼辦浙  
江軍務並著候補提督總兵張玉良總統諸軍迅速馳往援浙方  
翼大兵雲集立解城圍乃羅遵殿事前布署倉皇竟墮賊計本日  
據和春何桂清等馳奏二月二十七日逆賊在清波門暗掘地道  
將城轟塌三十餘丈蜂擁入城滿洲營官兵接仗殺賊眾寡不敵  
以致杭城失陷等語覽奏焦憤實深和春等疊次所派援兵爲數

已及萬餘何以全未趕到著和春張玉良查明各路帶兵員弁如有託故遷延卽立予正法見派王有齡署理浙江巡撫並著會同張玉良迅圖克復其在城文武各官下落著和春何桂清王有齡迅速查明具奏○諭軍機大臣等本日據扎拉芬泰等奏接裕瑞等函稱浩罕所屬提拉依地方有托古達買州等帶領五六百人紮住又阿克蘇所管卡拉巴哈地方住站布嚕特進山句結探聞浩罕已派倭里罕托古達買州帶兵五千於二月間前往冰嶺截官兵來路等語葉爾羌官兵毆斃浩罕額爾沁一案曾據裕瑞等奏明審結見在該浩罕派兵前來意圖報復是該大臣等前派阿奇木伯克寄信與浩罕伯克並未能折服其心辦理殊未妥協該浩罕稱兵犯順虛實雖未可知必須豫爲籌辦著裕瑞等一面設法曉諭該夷俾自知理曲不至別滋事端一面不動聲色妥爲防

範並安撫各處回民毋令勾結爲患仍隨時與扎拉芬泰會商安  
辦廻期消患未萌以安邊圉而弭兵端將此諭令知之○諭和春  
何桂清等杭州毗連蘇省爲財賦之區斷不可令該逆久踞致誤  
東南大局和春見已兼辦浙江軍務著與張國樑何桂清王有齡  
通盤籌畫一面進攻杭州一面嚴截竄路毋令擾附近各處力保  
完善之區並咨催前調閩兵二千及饒廷選所部兵勇迅速赴浙  
以厚兵力其米興朝一軍已到江口即可飭令攻城蘇州與杭州  
脣齒相依據何桂清徐有壬奏已募上海礮船四十隻派員帶赴  
嘉興一帶迎頭進擊並飭蔡映斗等嚴扼由浙入蘇之路務卽嚴  
密布置毋得臨事倉皇江南藩司辦理大營兵餉責任綦重著何  
桂清徐有壬保奏一員先行署理候朕簡放所有杭州文武下落  
著和春等查明具奏再前因官軍攻克沿江賊壘及九洑洲賊巢

諭令官文等飭楊載福水師與江南水師互相策應茲據該提督奏稱水師應仍在蕪湖以上巡扼沿江要口隨時截擊俟陸兵到齊攻復安慶後相輔東下儻金陵尙須礮船請飭和春將蕪湖以上紅單師艇調往下游等語楊載福水師旣專防蕪湖一帶所有紅單師艇卽可調赴下游俾呼吸相通互爲策應著和春等體察情形酌量辦理將此由六百里加緊各諭令知之○命欽差大臣和春兼辦浙江軍務甘肅肅州鎮總兵官候補提督張玉良總統援浙諸軍專辦浙江軍務○以王有齡署浙江巡撫由江蘇布政使署○

丁丑諭內閣和春何桂清等奏江南援兵會同杭州駐防官兵克復杭州省城一摺覽奏實深欣慰杭州省城於二月二十七日被賊攻陷杭州將軍瑞昌堅守駐防之城與賊廬戰候補提督張玉良親督官兵星夜遄行本月初二日馳抵大關初三日早出賊不

意將武林錢塘門外及昭慶寺賊壘全行埽蕩瑞昌調派八旗官兵總城閘勦斬獲甚多張玉良挑選奮勇緣城而上瑞昌亦督隊登城援應我兵大隊一擁登城會同旗綠官兵將城隍山校場等處屯聚逆賊斬獲殆盡遂將杭州省城克復杭州將軍瑞昌於省城被陷時尙能堅守駐防城至六日之久以待援兵會同克復厥功甚偉著賞穿黃馬褂並賞給二等輕車都尉世職候補提督張玉良出奇制勝於兩日內克復杭城實屬謀勇超羣著賞穿黃馬褂並賞給騎都尉世職署浙江巡撫王有齡密告機宜籌濟軍火糧餉不遺餘力著補授浙江巡撫迅帶兵勇馳赴浙省勦除餘匪辦理善後事宜欽差大臣江甯將軍和春兩江總督何桂清派兵援救不分畛域深堪嘉尚均著先行交部從優議敘江蘇巡撫徐有王者交部議敘衢州鎮總兵官李定太汀州鎮總兵米興朝赴

欽定平定三藩方略卷一百一十一  
三  
援杭州遷延不進殊堪痛恨著卽革職畱營效力仍著瑞昌等查明如有畏葸退縮情事卽著嚴參治罪其在城文武官員下落並著瑞昌王有齡迅速查明具奏○諭軍機大臣等昨據和春等奏廣德長興增添逆黨若不截其來路必致皖南之賊齧聚於浙雖省城已復而到處蔓延亦屬可慮廣德州是否尙爲賊踞見派何員攻勦四安爲入湖州正衝參將周天孚等前次挫敗恐不足恃鄭魁士帶兵四千由溧陽馳赴宜興自應迅速前進克復長興熊天喜一軍經王有齡商令如杭州無須添兵卽由嘉湖間道攻復德清著和春卽飭該提督等探明賊蹤奮力攻勦不得稍涉遷延致有貽誤江西饒廷選一軍本日復諭惲光宸仍令其兼程赴浙歸瑞昌張玉良等調遣以資攻勦其孝豐武康之賊亦應一律埽蕩毋任久踞和春距浙較遠何桂清等與浙密邇消息易通正可

就近策應王有齡見授爲浙江巡撫責無旁貸所有浙省應防應  
勦事宜著卽與瑞昌張玉良悉心籌辦以副委任羅遵殿等或稱  
殉難陣亡或稱救入駐防城中詳細情形著瑞昌王有齡查明具  
奏臬司段光清防守獨松關迨武康失守折回救援省城何以一  
聞杭州被陷卽與副將王邦慶退保海甯嘉興顯係聞警先逃著  
瑞昌等查明嚴參懲辦蘇常等處防務仍著何桂清徐有壬妥爲  
布置毋稍大意將此由六百里加緊各諭令知之○諭前有旨令  
總兵饒廷選率所部兵勇星速赴援浙江以資攻勦復據憚光宸  
奏分兵馳援浙江已飛飭署九江鎮總兵文瑞統帶兵勇二千餘  
名前赴杭湖應援等語見經和春派令張玉良馳赴杭州會同瑞  
昌將入城賊匪擊退杭州省城尙未失守惟城外尙有餘賊著憚  
光宸卽飭饒廷選星速帶兵前赴杭州協同駐守省城統歸瑞昌

張玉良調度所有文瑞統帶之兵毋庸前往杭湖著卽畱於江西浙江交界地方扼要駐紮嚴防敗竄餘匪擾及鄰境以固邊圉將此由六百里諭令知之○諭文煜奏東省餘兵餉米銀兩連同前欠請飭部覈議准於正項內支給覈銷一摺山東省添募餘兵經軍機大臣會同戶部議覈所需月餉令該撫另行籌款支給茲據奏稱自粵匪蔓延額設兵丁節次奉調外出存營出汎之兵不敷分防是以陸續添募餘兵此時勢難裁撤所需口糧無款可籌請將每季餘兵餉米銀兩上年冬季欠發之款一併在於正項內支給覈實造冊報銷等語見在庫款支紹兵丁設有正額豈能於正額之外添設餘兵東省兵丁雖經節次調出而空額虛糧積習相沿恐復不少著文煜嚴飭各營詳查缺額兵數卽將此項餘兵照數補足從前失察員弁免其置議儻有支離卽行嚴參並嚴定限

期勒令補足如逾限不能補足卽著該撫據實參辦果能於限內  
趕補足額仍准其開復如此嚴定章程庶兵丁不至再有缺額米  
餉銀兩亦無庸於例外開支致形缺乏又據奏兵勇勦賊失利等  
語據稱蘭山縣東莊寺地方聚有六七百人身穿號衣懸挂腰牌  
兼戴頂帽經費縣知縣周鵠會營迎勦初次失利旋屢募壯勇調  
集鄉團復行整隊出擊賊卽向蘭山一帶逃逸此股匪眾無論是  
否捨匪及散勇亟應悉數殲除勿令勾結土匪日久擾害地方著  
文煜卽飭黃良楷督同地方官嚴扼該匪竄路會合兜勦務期聚  
而殲旂本日據御史陳濬奏捻蹤逼近山東請飭江蘇山東督撫  
各於本省兵勇內籌派數千名遴派大員在豐碭適中之地分立  
兩大營互相援應遇有竄賊卽時截擊其如何嚴密布置之處令  
該督撫與督辦諸臣悉心商辦等語見在江南兵調赴援浙正當

喫緊之際東省防兵除德楞額黃良楷郝上庠分路防堵外亦無餘兵可調若令移紮豐碭之間山東腹地必轉致空虛著文煜知照德楞額並飭令黃良楷郝上庠各探賊蹤遇有警報卽行督兵出境迎頭截剿與傅振邦互爲聲援毋得株守東境致令匪蹤紛竄將此由五百里諭令知之○展五城煮賑一月○予雲南陣亡遊擊張萬祿祭葬世職○己卯諭軍機大臣等杭州省城見雖克復而近城地方賊蹤未盡埽蕩長興等邑城池尙爲賊踞卽著和春飭令張玉良督飭各路援兵克復各城毋畱餘孽其廣德一州地闊三省衝要若不克復則蘇杭等處防不勝防據和春奏探報杭州敗匪多赴廣德亟應撥兵截剿鄭魁士傷疾舉發已令劉季三帶兵四千前往宜興爲進攻長興之計又因流洞橋爲通溧陽要隘聚賊不少另派馮日坤前往進剿所籌均屬周密惟廣德州

係屬要路尙應添兵實力合圍速圖恢復毋令賊匪久踞庶幾蘇杭得保無虞再金陵軍營派出援兵爲數較多深恐逆匪乘機竄撲仍著和春等嚴密防勦一俟長興等邑收復後即可將赴援各軍漸次撤回將此由六百里諭令知之○諭官文胡林翼奏分兵援應浙江一摺據稱因接羅遵殿咨知浙江危迫亟謀救鄰之策飛撥候補知府蕭翰慶挑選精壯衛勇三千人並韋志俊義勇三千人飭令蕭翰慶管帶間道馳援浙江如果事勢更急再行遴員募勇備援各等語足見該大臣等敵愾同仇不存畛域之見惟浙江杭州省城二月二十七日失陷後旋於三月初三日經張玉良等會同瑞昌等攻復見在餘賊退踞廣德等處江南各路援兵亦已足敷勦辦楚省各軍見當分道入皖攻勦喫緊之時若以得力勁軍分撥赴浙深恐兵力空虛致形鬆勁所有蕭翰慶管帶之衝

勇義勇卽著仍畱楚省爲入皖勦賊之用毋庸改道赴浙如業已起程並著官文等迅速飛咨令其折回本境將此由六百里諭令知之○諭張芾奏浙省軍情緊急米興朝潰退富陽先請交部嚴議並請派重臣督師一摺浙江省城於二月二十七日被賊用地雷轟陷將軍瑞昌等尙堅守駐防滿洲城待援昨據和春等馳奏已於三月初三日經江南派往候補提督張玉良會同瑞昌等督兵克復米興朝救援杭城遷延不進已將該總兵革職畱營所帶之兵與援浙各軍均歸張玉良總統並諭令瑞昌等查明如有退縮情事卽行嚴參治罪見在浙省敗殘餘匪勢必各路分竄張芾卽當飛飭派往嚴州之前任浙江杭嘉湖道孫觀會同該地方官鼓勵鄉團隨時截勦並於徽郡交界處所派兵截擊毋令闖入徽郡再致蔓延至浙省長興武康孝豐德清等縣見當失守所有米

興朝一軍並江西派援之饒廷選一軍均須畱交張玉良調遣俟  
克復各縣後再行撥歸將此由六百里諭令知之○湖南巡撫駱  
秉章奏審明已革守備向東升前赴永州實係請兵請餉並無畏  
惄逃避情事惟疏防汛地失守應請革職得旨審結營弁之事因  
何不會總督銜況南省設有提臣巡撫不兼銜著明白回奏○以  
賈臻爲河南布政使邊沿禮爲河南按察使由南汝光道遷○以援浙不  
力責令已革總兵官李定太米興朝戴罪自效○予浙江省城殉  
難巡撫羅遵殿署布政使王友端道員穆梓祭葬世職○予湖南  
陣亡遊擊谷代維等祭葬世職○庚辰諭內閣胡林翼奏臬司審  
轉命案改擬失當請交部議處一摺湖北民人蕭汝秀毆傷胞叔  
蕭恆禮身死一摺前經軍機大臣覈議駁正所有該省承審審轉  
各員應得處分業經吏部照例議奏茲據胡林翼奏稱署當陽縣

知縣黃鍾鳴承審此案以蕭汝秀並非有心干犯依例擬罪照例夾籤署荆門州知州黃昌輔武昌府知府如山均照該縣原擬審轉本無錯誤原任按察使莊受祺誤會爲有心干犯刪去聲請夾籤實屬改擬失當請將莊受祺交部議處該撫未能悉心覈辦並自請議處等語所有此案處分該部另行覈議具奏○辛巳諭內閣滿慶等奏察木多兩造逞兵仇殺委員帶兵彈壓忘事並見辦情形一摺工布汪曲與察木多因案控訴結連博番抗不赴傳復與察木多互相仇殺兵連不息經滿慶等派令委員候補知縣李玉圃前往丹達帶同噶布倫宜瑪崙珠親赴兩造營盤開導該番陽奉陰違仍於赴近居夷處所焚搶博窩境內之宿木宗宇茹棍噶朗三處第巴復添派番兵至巴里郎地方助工布汪曲滋事經該委員檄調碩板多工布江達等處土兵分布要隘紮營控制隨

與噶布倫帶兵赴巴里郎面諭博番頭目退兵該番目仍肆鴉張  
經該委員與噶布倫等派兵設伏於該番目來營要挾時將各番  
目立時捆縛並砍斃從番五人餘眾及被捆縛番目始悔罪乞命  
聚眾挾營之番眾亦經伏兵截回其噶朗等三處各第巴亦經該  
委員等豫派弁齋帶賞件檄諭撤兵該第巴等旋即遵檄令巴里  
郎番目撤兵出境各歸牧所察木多兩造番眾見已震懾兵威情  
願退兵歸案聽審辦理尙屬妥協所有全案人證著卽派兵押赴  
藏中秉公審斷以昭慎重○諭滿慶等奏喇嘛專差進貢想請援  
案由四川進京一摺班禪額爾德尼呼畢勒罕於本月十日坐牀  
後專差巴爾雅堪布呈進丹書克貢物具見悃忱著准其援照成  
案仍由四川進京以示懷柔遠人至意○予江蘇陣亡道員吳葆  
晉等祭葬世職○癸未諭軍機大臣等袁甲三奏請仍令穆騰阿

統帶馬隊並添調吉林黑龍江餘丁各等語袁甲三軍營馬隊向歸穆騰阿統帶若遽易生手接管深恐難資駕馭該都統見在幫辦軍務所有軍營馬隊著仍由該都統管帶以利攻勦至吉林黑龍江馬隊頻年徵調爲數已多勢難再行派撥雖添調餘丁止三百名而一切整裝等項銀兩需費不貲勝保前請亦未允准著毋庸議定遠賊勢已衰著卽會同翁同書一軍迅速進勦毋任遲延天長一縣久爲賊踞揚州兵力未必能遠攻袁甲三當早籌克復以免東竄見在清江竄匪一律肅清著該大臣體察情形分撥精兵進規天長迅圖克復惟彼處與六合相爲犄角當約會江北各軍同時進攻六合以免此勦彼竄將此由六百里諭令知之○僧格林沁等奏通籌全局請在各省設法勸捐以實戶部而裕軍儲得旨所請晉豫東三省勸捐接濟京防各餉實因顧全大局起見

見在指撥派撥以及藥稅加成各項京餉奏咨嚴催勒限起解何  
啻至再至三該督撫自應激發天良督飭藩司源源撥解以京師  
爲重若再加以續捐三百萬多多益善豈不更覺充裕然各省勸  
捐數載於茲恐未必如前踊躍況那東補西不過變一名目而已  
著戶部認真查覈見在應撥京餉已解若干再行奏明嚴催以期  
有益兵民僧格林沁等所請實屬可行惟應於此三省續捐數內  
劃撥京餉幾成海防經費幾成或先儘海防有餘再行解京一面  
嚴催各項京餉以清眉目勿得專顧目前致各省以勸捐爲由轉  
置正撥於不問希冀寬免嚴議至應派道府大員以專責成俟部  
議奏上時再行分別寄諭○甲申諭內閣前因翁心存杜翻再行  
回奏均稱司員並未將兌換寶鈔之事回堂當諭載垣等再訊忠  
麟王熙震有無質證確據茲據奏稱覆訊忠麟等供稱約略記得

回過翁心存杜翻並無確證等語此案以短號寶鈔兌換長號寶鈔其時價值雖未有低昂但係更改舊章自應回明各堂立稟辦理乃忠麟等僅稱回過翁心存杜翻其餘堂官概未回明未立稟存案辦理本屬錯謬何得以影響之詞意存委過至翁心存等在部有年卽或當時疏忽何以鈔價既有低昂之後仍屬毫無覺察是忠麟等回堂一節雖無確據而該堂官於部務漫不經心實難辭咎翁心存杜翻均著先行交部議處無庸再行回奏亦無庸傳訊其餘失察之戶部各堂官著俟定案時一併查取職名交部分別議處○乙酉 上還宮○諭內閣浙江按察使段光清前因賊匪竄入浙境經巡撫羅遵殿派令帶兵防守獨松關迨賊撲杭州省境折回救援乃因省城失陷卽藉詞接仗失利與副將王邦慶退至海甯嘉興顯係聞警先逃茲聞杭城克復仍卽來省種種奸

指情弊實屬罪無可逭段光清著卽革職拏問交何桂清和春王有齡嚴行審訊從重定擬具奏王邦慶係杭州協副將何以與段光清一同退避該員見在何處並著查拏一併懲辦○諭軍機大臣等本日據瑞昌等奏克復杭州省城詳細情形各摺片該將軍所稱羅遵殿於城陷時與妻女一同殉難羅遵殿之妻係何氏其女幾人羅遵殿王友端繆梓葉望馬昂霄李福謙等是否殺賊遇害抑係在署自盡均未明晰聲敘仍著查明詳細具奏此外同城之錢塘令及文武各官有無被害及逃避出城情事並在城紳士被難者若干著一併詳查分別奏參請卽杭城雖已收復餘匪竄至餘杭據奏已派兵進剿其長興孝豐武昌德清各縣均未收復亟應派兵分剿前據和春等奏擬令熊天喜一軍規取德清此外各縣尙未據奏派何人前往攻克和春遠在江南鞭長莫及卽著

瑞昌張玉良王有齡會同籌商迅速辦理卽如前調之饒廷選一軍計已到浙卽可派令與米興朝一軍分投掃蕩攻克四縣不令久踞蔓延至廣德爲浙江門戶已諭令和春調度總期迅速克復以免賊匪踵至張玉良著卽留於浙江督辦軍務以資得力臬司段光清當省城失陷之時輒與副將王邦慶出城茲聞克復卽已回省居心實不可問已明降諭旨將其革職拏問交和春何桂清王有齡查辦該將軍等見令該員兼署藩篆自係爲一時乏人起見惟此等劣員斷難姑容前令何桂清等於江南遴選明幹道府數員赴浙幫辦地方事宜所有司道等缺即可酌量委署以專責成將此由六百里諭令知之○諭勝保慶廉奏擒匪竄擾豫疆逼近省垣請調馬隊助剿並聞東路擒匪尙圖擾害清江請飭防範等語捻匪於三月初七八等日已至睢州遂擾及蘭儀通許見在

省垣五六十里之外已有賊蹤竊探賊勢固屬剽疾而豫省地方文武所司何事竟聽匪眾長驅直入關保駐繁鹿邑何以於該匪犯豫時並未派撥官兵截勦致捻眾得以深入尤出情理之外見據該副都統等奏稱業已調派兵勇分投迎擊卽著勝保等督飭弁兵實力堵勦務將此股逆匪悉數殲除毋任蔓延儻不速行勦辦致汴梁或有疏虞或竟由豫北竄則責有攸歸前降諭旨甚明朕惟有執法懲治不能寬貸至請調吉林黑龍江馬隊一二千名等語見在北路情形勝保豈不知悉何竟曉曉瀆請勝保在皖時馬隊官兵不少乃自護城等處屢次敗績傷亡甚多請卽時分爲兩次意存掩飾尙畱百餘交袁甲三奏請議卽其中吉林黑龍江將領已屬不少兵丁尙不在內以東三省勁旅因調度無方致令紛紛戰沒言之實堪痛恨嗣後勝保軍營於須酌添馬隊著與傅

振邦商酌分別應用所有請調之處著不准行至清江經賊蹂躪已成熟路據勝保奏探聞有再圖竄擾之說亦不可不防卽著傅振邦田在田勤加偵探儻實有東竄消息務卽派撥勁兵嚴行扼截並飛咨德楞額黃良楷等一體截勦毋任再有蔓延將此由六百里各諭令知之○諭本日據勝保慶廉奏捻匪大股竄入豫境擾及省垣見舒布置情形一摺據稱捻首孫葵心等大股竄至商亳交界於正月至二三等月由豫省睢州境內分股向蘭儀通許等處擄掠馳行甚捷見在距省之五六十里白邱等村已有賊馬規探豫省兵力單薄能否遏截尚無把握已飛札大名鎮道督兵赴考城防堵並咨會河督黃贊湯嚴防黃河等語捻匪竄入豫省勢甚猖獗直隸大名一帶幅近賊氛防務最關緊要恆福卽飭大名鎮道督率在防官兵出境截擊毋令闖入畿疆致滋延蔓並著

僧格林沁恆福勤加探訪儻賊蹤已渡黃河卽由僧格林沁於天津防兵內酌派馬隊精兵馳往截勦以杜北竄將此諭令知之○調湯雲松爲浙江按察使以王夢齡爲江蘇按察使記名按察使○予

江蘇殉難知府馬昂霄等祭葬世職○丙戌諭軍機大臣等前因賊擾清江所有失守地方衙署之文武各員均有應得之旨降旨令何桂清等查明嚴參見在清江雖已克復然聞桃源宿遷一帶民不畏官恃強搶奪總由地方官見賊先逃致爲百姓藐視此風斷不可長況昨據勝保等奏東路捻匪尙圖擾及清江雖係探報之詞而該匪曾經竄撲路徑已熟且恐土匪從中勾結更宜先事防維著何桂清會同聯英查明失守之文武各員從嚴參辦勿令僨事之員忝居司牧以致民不畏法貽患地方俟查明應劾各員後卽揀派幹員分往接署以專責成其清淮一帶防守事宜卽著

安等布置勿致臨事周章至淮徐道王夢齡昨已簡放江蘇按察使該員在任年久於防守地方及籌撥軍餉事宜尙爲得力著何桂清等體察情形如有堪以接任之員卽飭王夢齡前赴新任儻一時接手乏人卽將王夢齡奏請暫留徐州所有江蘇臬司該督撫另行派員署理將此由五百里諭令知之○丁亥祀 先農

親耕耤田○幸圓明園○戊子予廣東陣亡巡檢束炳泰祭葬世職○己丑諭內閣吏部奏遵議張芾疏防處分一摺都察院左副都御史張芾督辦皖南軍務本年正二月間賊匪疊陷涇縣廣德州等處數城以致杭州失守實屬咎無可解姑念賊匪由甯國一帶竄出張芾遠在徽州亦當防勦喫緊之際著暫行革職仍責令督辦皖南軍務以觀後效至周天受以武職大員駐紮甯國當賊匪竄陷廣德時未能實力堵截尤難辭咎周天受著革職留營並

革去巴圖魯名號毋庸交部議處仍令督兵將涇縣廣德等城迅  
圖克復以贖前愆○諭軍機大臣等陳孚恩成琦奏江浙海運商  
船陸續抵津請飭該省糧道迅速赴津辦理一摺江浙兩省抵津  
米船現已有二百三十餘隻正在驗收喫緊之時該各糧道既未  
抵津又未據報起程日期此後米船連檣北上辦理乏人經費又  
無所出著何桂清徐有壬王有齡卽飭各該糧道迅速兼程前赴  
天津毋任稽畱致誤運務前據羅遵殿奏截畱附省各屬漕米數  
萬石運赴省城此項米石有無被賊焚劫著王有齡查明具奏浙  
江三批以後漕船應否卽行放洋著何桂清查看上海情形知照  
該撫與蘇省一律辦理至杭城雖已克復長興等四縣尙爲賊踞  
瑞昌張玉良籌商迅派得力兵將往勦務將失陷各縣次第克復

毋令蔓延他處江蘇與浙江省唇齒相依著何桂清就近籌畫策應  
資助兵力非獨兼顧浙省亦以自固疆圉至廣德爲浙江門戶賊  
氣一日不靖則江浙一日不安前經諭令和春等力圖攻克毋令  
該逆久踞將此由五百里各諭令知之○諭前因勝保等請調馬  
隊諭令與傅振邦商酌分撥應用本日據奏近省捻股悉數擊退  
折竄西南仍請飭調馬隊一二千名赴豫助剿等語捻匪竄逼河  
南省城經勝保親督弁兵截剿該匪半由睢州回巢半由西南挺  
走尉氏並探聞孫葵心大股逆眾復欲由潁城西竄勝保督辦豫  
省軍務兵力固屬稍單亦視調度是否得宜該副都統等見經招  
集降眾一千餘人可以助戰前奏按戶抽丁諒亦早經辦理務當  
實心兜勦將該捻就地殲除不得株守省垣致令紛竄所需馬隊  
著遵照前旨於傅振邦軍營通融分撥不得再行瀆請閽保駐紮

鹿邑何以於捻匪竄豫時並未派兵截擊及至賊已深入始由睢州赴援是否年老遲鈍或該員平日有惟怯情形卽著勝保會同慶廉據實參奏另簡幫辦之員以資得力毋令坐失事機此次出力將弁准其先行存記俟續有勞績庸清豫境後彙案保奏候朕施恩將此由六百里諭令知之○庚寅諭內閣前因徐之銘保奏張亮基之子陝西候補知府張向宸盡著戰功等語當諭令該撫查看該員如續有戰功卽據實保奏茲據張亮基瀝陳軍營出力將士未邀恩獎者尙不乏人伊子不敢驟邀恩施徐之銘則稱張向宸管帶練軍疊破安南州等處賊營斬獲首級奏請獎勵張向宸隨同伊父赴滇雖有勞績而該撫必欲優保其意何居旣據張亮基懇切陳情卽著無庸給獎如以後再有過人勞績卽著該撫據實聲明候朕施恩○諭軍機大臣等本日據張亮基徐之銘奏

滇省昭通東川等處與四川壤地毗連僅隔一江去冬今春屢有  
巴布夷人黑蠻偷渡過江肆行燒殺並掠人勒贖此股夷蠻係四  
川甯遠府西昌縣雷波廳各屬土司所轄請飭四川會勦等語巴  
布夷蠻眾眾至二三千人之多屢由川境渡江入滇肆擾若不及  
早勦除必致釀成巨患著曾望顏迅卽派兵會合滇省兵練四面  
兜擊痛加勦洗勿畱餘孽以安邊圉而除後患至此股夷蠻是否  
係甯遠雷波府廳各屬土司所轄並著曾望顏確切查明嚴飭地  
方文武卽將滋事夷匪巢穴埽除毋任推諉貽誤致滋蔓延將此  
諭令知之○諭前因滇餉緊要諭令曾望顏等迅速籌解茲據張  
亮基等奏四川陝西僅各解到銀一萬兩山西由蜀兒撥銀一萬  
八千兩尙有一萬兩未據四川起解請飭令四川陝西每月撥銀

下六七萬人全賴四川等省協撥兵餉以資接濟見在張亮基等  
所請協撥兵餉爲數無多著曾望顧英桂譚廷襄督飭各藩司必  
須按月如數撥解不得再有短絀致誤要請將此由六百里各諭  
令知之○諭張亮基等奏田興恕見署貴州提督通省官民無不  
額手稱慶桂黔省旣無存款他省協餉又不可恃若驅飢疲之卒  
枵腹荷戈日與怨亦恐束手請飭駕乘章將楚師之在黔者仍歸  
湖南籌餉等語貴州餉需支絀異常駕乘章素能不分畛域頗全  
大局所有見在援勦貴州之湖南各軍仍著該撫設法籌撥餉請  
毋使缺乏將此由五百里諭令知之○諭前因杭城克復餘賊竄  
入餘杭一帶營經諭令瑞昌等催提援兵迅籌攻勦本日據慶端  
奏知浙江軍情緊急已調閩省省標等兵共二千名派副將斐什  
韻等統帶星馳赴浙等語浙江省杭城雖已克復而長興孝豐武康

德清四縣尙爲賊踞正需兵力埽蕩此項官兵到浙善卽交張玉良調遣飭令會同和春等派往之兵分投攻勦迅圖克復四城以固浙江省門戶慶端業已派兵前往諒不至因杭城已復遂行撤回至浙省援兵雲集餉需無從措辦前諭慶端等迅籌十萬兩委員解浙以濟急需卽著迅速籌解毋許遲誤將此由六百里各諭令知之○諭有人奏捻匪竄至豫省通許一帶勢將窺伺山陝且躡陝西涇陽渭南等處回民有蠢動之意恐致勾結不可不豫籌防範西路形勢惟虎牢關最爲緊要若派兵扼守可杜竄擾山陝之路訪聞丁憂知府張曜素有威望請飭帶兵防守等語豫省捻匪昨據勝保等奏稱竄往西南已諭令督兵兜剿迅速就地殲除虎牢關爲西路扼要之區自應嚴密防堵著勝保處處酌量情形如知府張曜堪勝帶兵之任卽派官兵五六百名令其前往虎牢關

防守並准其招募壯勇以資協助儻該員見署要缺不能抽身卽另行委員前往或因豫省兵力不能分撥自應先顧省城所有虎牢關防務再行籌畫辦理總期有備無患以免疏虞原摺著鈔給閱看將此由六百里諭令知之○御史薛書堂奏南河自黃水改道後下游已成平陸無工可修濱淮墻堤亦以河運未復久不葺治請將南河河督及各廳員悉行裁撤得旨該御史所奏裁汰河員各事宜著御前大臣軍機大臣會同該部議奏爾王大臣等務須統籌全局不可畏難尤不可恐爲怨府該河督數載經營所辦何事不過屢籲帑餉蒙此無用之輩而已○雲貴總督張亮基等奏飭令前任雲南迤東道汪之旭赴部引見得旨於覆奏之中隱有薦語殊屬不必又奏黔餉難籌惟查瀘永一帶有存積黑白鉛三千五百餘萬斤若就近變價計值數十萬金批變價鉛斤俟章

程奏准後方可運往不淮擅行提解又奏請以貴東道何冠英糧儲道韓超幫同署提督田興恕辦理貴州勦匪事務從之○以賈洪詔爲雲南布政使龔自闕爲貴州按察使由貴西道遷○予雲南陣亡參將孫鈺等祭葬世職並追予湖南殉難知縣李右文於原籍建祠○辛卯諭內閣翁同書奏舒城截擊粵匪及桐城勇練會合水師擊破渡江援賊生擒賊目一摺賊首四眼狗陳玉城由浦六來援潛太裏脅甚眾圍撲六安壽州經副將盧又熊等擊退舒城縣知縣甘文瀾於二月二十日親督勇丁薄賊頭營該逆拒守不敢出戰甘文瀾遣人繞過營後突起躍壕斃賊數十名該逆潰奔復逼攻該逆營次燒燬逆房多間餘賊始行逃遁同時北路官兵復攻破賊營一座殺賊三十餘名追殺數里桐城東鄉練勇在破岡烏金渡等處屢獲勝仗二月初八等日經在籍知州疏長庚齊

集練勇會同水師駛往大龍潭伺賊半渡擊覆賊船不計其數外  
妥裴人傑等由桂家壩擊已渡之賊大獲勝仗著翁同書督飭員  
弁乘勝進攻迅卽礮除醜類勿畱餘孽其在事出力人員准其俟  
克復桐城後彙案請獎候朕施恩○癸巳 皇后祀 先釐○和  
春奏長興縣治在浙江湖州府城西北爲第一扼要之區臣疊飭  
總兵劉季三由宜興進攻熊天喜出烏程歸安進攻湖州府紳董  
趙景賢等願帶民團前往會勦熊天喜督隊攻毀虹星橋賊營兩  
座卽因賊壘駐紮以期規復長興時湖州府瑞春派委長興縣徐  
之鑑帶領民團萬餘與賊相持候補總兵曾秉忠適帶長龍船由  
太湖夾浦駛至縣東民團見官兵忽至歡聲雷動兵民奮力夾攻  
逆勢不支敗退入城曾秉忠舟師已從小東門水關駛入民團亦  
卽進城逆匪驚懼逃逸遂於三月十五日克復長興縣城劉季三

卽統帶所部馳赴溧陽進攻廣德據李定太函稱杭州府屬之臨安縣已於初八日克復湖州府屬之孝豐縣亦於十四日克復餘逆均竄廣德李定太卽在孝豐縣城暫時扼聚米興朝一軍亦於途中會合等語又據鄭魁士周天受等函稱浙西賊黨齧聚廣德亦將南國府城東路之紅林橋占踞其意總爲救援金陵逆首起見臣亦函致鄭魁士並嚴飭劉季三熊天喜各鎮相機會辦堵勦兼施無任外援之賊與金陵首逆會合則石城斷難久持東南軍務大有轉機矣至曾秉忠當賊匪攻撲湖州府城時師船一至立解重圍此次又能於民團擊賊之際由水路赴援馳入縣城立時克復寶屬奮勇該縣民團男往殺賊志切同仇並堪嘉獎應由浙江撫臣查明奏請施恩以示鼓勵上諭內閣和春奏官兵克復長興等縣並據各路稟報杭州府屬之臨安縣湖州府屬之孝豐

縣亦已克復卽著和春嚴飭帶兵各員乘勝搜捕竄匪收復各縣  
俟肅清浙境後卽當力攻廣德毋令久踞記名總兵曾秉忠及出  
力之官兵民間等均著瑞昌張玉良王有齡查明保奏候朕施恩  
○諭軍機大臣等著印三奏粵逆糾眾竄擾滁全派兵援勦一摺  
粵逆陳玉城因官軍克復全椒糾黨數萬由和州含山竄至兩面  
夾攻全椒復在腰鋪十五里墩小山頭等處紮營直逼滁城雖經  
李世忠等竭力守禦奮勇攻擊而被毀賊營旋卽搶築全椒糧道  
斷絕情形甚爲危急且該逆有欲由江浦進攻九洑洲之說設該  
處有失賊勢愈形猖獗袁甲三見雖先後派兵前往援勦尙恐兵  
力單弱著和春張國樑酌撥江北勁旅由江浦一帶會合夾擊力  
保滁全並著袁甲三嚴飭烏勒興阿等統帶馬步兵勇馳往助勦  
毋稍遲誤將此由六百里各諭令知之○諭前據瑞昌等奏按察

使段光清等於二月二十七日與賊打仗失利後出城追集援師  
三月初六日進城等語當降旨將段光清革職拏問交和春等嚴  
行審訊從重定擬具奏茲據徐有壬奏段光清續報杭城失守情  
形具摺稟請代遞先後不符一摺段光清前經稟稱羅遵殿派令  
防守獨松關迨賊樸杭城折回救援各門堅閉於二十六日晚間  
密約城中員弁於二十七日黎明出城迎擊該逆先在清波門攻  
陷城垣屢次衝擊眾寡不敵卽與副將王邦慶退至海甯嘉興見  
又奏稱回援省城不能前進於二月二十九日沿江繞至海甯聞  
杭城已於二十七日失陷等語且原摺填寫三月初三日於三月  
十七日始行齎交徐有壬代遞計期已隔半月之久前後情節種  
種不符顯係藉詞掩飾著何桂清和春王有齡仍遵前旨將段光  
清嚴訊定擬具奏徐有壬段光清摺俱著鈔給閱看將此由六百

里各諭令知之○已革浙江按察使段光清奏省城被陷見辦浙江防堵情形得旨此所謂不勘自招城失卽遁城復卽回覲顏露面何以生爲○和春奏江北九洑洲搘斷以後金陵南岸沿江上下二關及上河等險又爲我軍所據賊勢日形窮蹙張國樑親至城西南隅各路查看形勢先將三汊河營盤移至上河地方便於進攻上河街內伏有賊匪千餘卽來攻撲張國樑揮軍三路鈔擊殺賊甚眾該逆敗潰追至江東橋頭我軍已於上河街頭紮營六座張國樑又督同總兵黃靖帶隊至江東橋之東滾營前進該逆見我軍之進逼也率黨約二三千由橋內兩路衝出張國樑一面飭夫役人等在後築營一面檄令黃靖等分左右齊進自帶兵勇居中策應該處池塘甚多逆黨憑恃爲險因令兵勇鳧水而過出其不意登岸從旁鈔擊該逆不知所爲立卽奔潰回巢我師從後

掩殺追至橋頭賊壘之前水西門又出賊援千餘襲我之背使我  
不能安營張國樑揮令後隊回擊而橋上賊營復出千餘兩面突  
至我軍分投抵敵鏖戰約一時許橋上之賊又敗援賊膽落始退  
回水西門我軍新營已紮成八座西南隅營壘均已一律紮成張  
國樑又至南路之安德門地方帶兵護築營盤已成三座惟一座  
尚未竣工該逆乘我之倦出黨二千餘名來撲我軍分路出擊守  
備張啟冉得勝深入賊叢該逆重重圍裹張國樑親督小隊殺入  
重圍賊始敗退我軍已於安德門毛公渡地方築營四座當我軍  
在東南隅移營時該逆進攻南路長牆意欲分我兵力副將馬登  
富等憑牆固守轟斃賊匪甚多待至申刻見該逆正在撤退開門  
突出薄之逆眾大潰由聚寶門雨花臺逃回斬馘數百賊復夤夜  
出撲又被擊敗退至山坡城中又有續到之賊分股而來我軍先

於牆內以火器轟擊迨援軍調至開營出擊斃賊不可勝計該逆  
仍退往雨花臺聚竄門而去南北兩岸關隘爲我攻奪業已移近  
營牆步步前進而已阱之獸猶復死守以待外援疊據皖南探報  
江北之賊日有竄併蕪湖太平者浙西之賊亦有回竄廣德希圖  
進犯建平溧陽東壩者該逆知我分兵四出意欲謂集羣醜救應  
金陵刻下內防竄突外擊逆援臣等總當就見有兵力設法圍維  
以冀挾渠擣穴又奏浙江逆匪大股見已回竄廣德在建平東夏  
一帶撲竄副將馮日坤等由建平向東夏一路迎勦熊兆周由東  
夏向建平一路迎勦斃賊多名鄭魁士已加派兵勇前往協助該  
逆屢次搭造浮橋均被官軍擊散建平緊接滻壩必須嚴加堵禦  
原部兵勇二千馳赴滻壩聽候鄭魁士調遣均報聞○甲午諭軍

機大臣等前據僧格林沁等奏通籌全局擬在晉東豫三省勸捐接濟京津各餉當諭令戶部認真查覈一面嚴催各項京餉毋致各省以勸捐爲由轉置正撥於不問茲據戶部奏遵旨查覈該三省歷年捐輸各案爲數業已不少該士民情殷報效雖捐項至再至三猶形踊躍請飭山東山西河南各巡撫體察各該地方情形奏明辦理等語僧格林沁等擬在該三省設法勸捐係爲籌辦京津各餉起見旣據戶部奏稱該三省士民歷年勉竭餘貢力圖報效著文煜英桂慶廉體察情形悉心籌畫詳細具奏總理各處京餉地方兩無窒礙方爲妥善至各省派委勸捐各員難保無倚勢作威多方抑勒藉端滋擾情弊甚至有賄求屬託將有力者指爲下戶無力者指爲殷實反覆顛倒曲濟其私或以完作欠或以多報少彌縫侵蝕半歸私橐種種弊端深堪痛恨並著各該撫力除積

弊遠遜公正紳士會同地方官妥爲勸辦以濟要需將此各諭令  
知之○何桂清奏各國接到回文報復之念益堅諭僧格林沁隨  
時偵探相機堵禦○惲光宸因病乞假以毓科暫護江西巡撫由布政使司

護理○何桂清徐有壬奏查浙江軍務自克復杭州後餘杭敗匪

竄逼臨安復由孝豐竄回皖南其屯聚長興之逆意欲分股一由

太湖徑犯蘇州一由山路徑犯宜興升任藩司王有齡因嘉興一

帶已有礮船四十號在彼堵禦平望情形較鬆而太湖水面遼闊

防範難周咨令署臬司蔡映斗在平望防所抽調礮船親自督帶

駛入太湖南岸之大錢口嚴行堵禦湖州紳士趙景賢等勸諭團

練共有數萬人聲勢頗壯總兵熊天喜馳抵湖州卽督參將羅熙

賢等分路進兵又約會總兵劉季三遙作聲援總兵曾秉忠會同

民團將長與城外賊壘埽除克復縣城並將青草塢賊巢焚毀見

在熊天喜已進紫四安擬卽由此進兵劉季三由流桐橋進兵會攻廣德其湖州府屬之安吉德清二縣均經先後克復武康縣城聞亦退出浙江既已得手甯國府城必將喫緊先經周天受調兵在甯國廣德交界之紅林橋紮營以杜回竄三月十五日該逆攻撲紅林橋營盤眾寡不敵以致失陷該逆又徑撲建平縣城經鄭魁士派兵堵勦尙未退去臣等已飛飭熊天喜劉季三緊攻廣德儻能得手則建平之賊亦不擊而自退復據溧陽縣稟報該縣忽有逆匪由山僻小徑而來當經兵勇擊退恐有大股續至見在登陴守禦等情溧防兵僅八百名總兵劉季三一軍已進紫流桐橋會攻廣德勢難遽撤臣等已會商和春劉季三迅速設法救援一面督飭常州宜興金壇官紳整頓團練以備不虞報聞○是月展緩廣東南雄等六州縣被擾地方舊欠額賦蠲緩直隸安州等三

州縣積澇地方新舊額賦蠲免福建龍巖等三十九州縣汀州等  
四廳暨溪口州同嵐下等縣丞所屬被擾地方新舊額賦准山西  
吉州等十二州縣歉收地方出借倉穀並緩保德等十州縣應買  
補節年平糶暨借碾兵米穀石